

تعليم الصلاة

أركان الإسلام والإيمان

**BARNOOTA  
SALAATAA**

FI

ARKAANA ISLAAMAFI  
ARKAANA IIMAANAA

الأورومية

سلطنة  
Sultanah



# **BARNOOTA SALAATAA**

## **AKKAATAA SALAATA NABIYYII**

**"Akka Yoo Ani Sagadu Argitanitti Sagadaa" (Al-Hadiis)**

## Baafata

Mata Duree	Fuula	Mata Duree	Fuula
- Dursa .....	5	<b>KUTAA SADAFFAA</b>	
- Seensa .....	12	<i>AZAANA FI IQAAMAA</i>	
 <b>KUTAA TOKKOFFAA</b>		• Seenaa Jalqabama Azaanaa....	28
<i>SALAATAAF QOPHII</i>		• Mu'azzina (Azaana Godhaa)...	30
<i>DURA</i>		• Jecha Guutufi Qabiyyee	
• Wuduu'a Dura.....	15	Azaanaa.....	30
• Rigaa (Siwaaka).....	15	• Azaana Dhageeffachuu.....	31
• Wudu'aaf Yaaduu (Niyyachuu)..	15	• "Salaat Alan-Nabii" Azaana	
• Akkaataa Wuduu'aa.....	16	Booda Godhamu.....	32
• Sirna Addaa kan Wuduu'aa....	17	• Du'aa'ii Azaana Booda	
• Du'aa'ii Wuduu'a Booda		Godhamu.....	32
Godharuu.....	18	• Iqaamaa.....	33
• Tayammuma(Wuduu'a Gogaa)19		• Akkaataa Dubbifamaafi	
• Sirna Tayammumaa.....	19	Qabiyyee Iqaamaa.....	33
 <b>KUTAA LAMAFFAA</b>		 <b>KUTAA AFRAFFAA</b>	
<i>YEROO, BAKKA, UFFATAAFI</i>		<i>SIRNA (AKKAATAA) SAGADAA</i>	
<i>BIFA SALAATAA</i>		• Sutraa (Dallaa Qiblaa).....	33
• Yeroo Salaataa.....	20	• Qiblaa (Jihaa Salaataa).....	35
• Yeerowwan Salaanni		• Niyyachuu (Niyyaa).....	36
Keessatti Dhoorgame.....	22	• Takbiirata-Tahrim.....	36
• Salaanni Idaasaa (Naflii)		• Harka Dachaasanii	
Yeroo Keessatti Dhoorgame... 22		Boqachiisuu.....	37
• Bakka Salaanni Itti Sagadamu23		• Du'aa'ii Seensaa.....	39
• Uffata Salaataa.....	24	• Ta'awwuza (Maganfannaa)....	40
• Bifa Salaataa.....	25	• Tasmiiyah -Maqaa Rabbiitin	
• Salaata Fardii Yookan		Jalqabuu.....	40
Dirqamaa.....	25	• Suuratul Faatihaa (Suuraa	
• Salaata "Naflii" Yookan		Baniinsaa).....	40
Dabalataa.....	25	• Imaama Duuban Suuratul	
• Baay'ina Raka'aa Salaatota		Faatihaa Qara'uu.....	42
Fardii Shananii.....	26	• Aamiin Jechuu.....	43
		• Suuraa Faatihaa Duuban	
		Qara'amu.....	43
		• Rukuu'a (Gadi Jechuu).....	45
		• Du'aa'iwwan Rukuu'aa.....	46

## Baafata

Mata Duree	Fuula	Mata Duree	Fuula
• Akkaataa Ijjannoo Rukuu'a Boodaa.....	48	• Qaraasafi Qabiyeec Du'aaii Qunuutaa.....	67
• Du'aa'iwwan Yoo Rukuu'arraa Ka'an Godhaman.....	48	• Salaata Jum'aa (Jimaataa).....	68
• Sujuuda (Adda Lafaan Tuquu) Jalqabaa.....	50	• Qulqullina Dhuunfaa.....	69
• Du'aa'iwwan Sujuudaa.....	51	• Ganamaan Gara Salaata Jum'aa Deemu.....	69
• Jalsaa (Teessuma) Sujuuda Lamaan Gidduu.....	52	• Salaata Jum'aa Dura Sagadamu.....	70
• Sujuuda Lammaffaa.....	53	• Khuxba (Gorsa) Cal'isanii Dhageeffachuu.....	70
• Jalsatul-Istiraah (Teessuma Boqonna Gabaabduu).....	54	• Salaata Jum'aa.....	71
• Raka'aa Lammaffaa.....	54	• Salaata Jum'aa Booda Sagadamu.....	71
• Tashahhuda.....	54	• Salaata Iidaa.....	72
• Raka'aa Sadaffaatif Ka'uu.....	56	• Akkaataa Rawwii Salaata Iidaa.....	73
• Salaat Alan-Nabii (Nabiyyiirratti Raahmanni Akka Bu'u Du'aa'ii Godhuu)...	56	• Salaata Janaazaa (Reeffaa).....	73
• Du'aa'iwwan Salaat Alan-Nabii Booda Godhaman.....	57	• Akkaataa Raawwii Salaata Janaazaa.....	74
• Salaata Xumuruu.....	60	• Du'aa'iwwan Janaazaaf (Nama Du'eef) Godhaman.....	76
• Du'aa'iwwan Salaata Booda Godhaman.....	60	• Salaata Imalarrattii.....	79
• Zikrii (Rabbiin Faarsuu).....	62	• Yeroo Salaata Gabaabsufi Walitti Qabuun Danda'amu.....	80
• Salaatul Mariid (Salaata Dhibamaa).....	62	• Naflii (Salaata Dabalataa) Imalarratti Sagaduu.....	81
<b>KUTAA SHANAFFAA</b>		• Sujuuda Daguu.....	82
<i>SALAA TOTA YEROO ADDA ADDAA</i>		• Salaata Jama'aa (Waliinii).....	83
• Salaata Witrii.....	63	• Salaata Halkanii (Tahajjuda).....	85
• Baay'ina Raka'aa Salaata Witrii.....	64	• Salaata Taraawiihaa.....	88
• Yeroo Witriin Itti Sagadamu...	64	• Salaata Duhaa.....	89
• Akkaataa Sagada Witrii.....	65	• Salaata Kusuufaa.....	90
• Du'aa'ii Qunuuta Salaata Witrii.....	66	• Salaata Istikhaaraa.....	91
		• Salaata Haajaa.....	92
		• Salaata Istisqaa.....	93
		• Sujuuda Tilaawaa.....	94
		• Kitaabolee Maddaa.....	96



## DURSA

### ISALAAMA KEESSATTI SADARKAA SALAATAA

Salaanii:-

- utubaa Islaamati
- jihaada irraayis jihaada filatamaa dha,
- ifaa mu'uminaati.
- furtuu Jannataati

Dhugaan muslimni kamiyyuu beeku qabu salaanni utubaa Islaamaa ta'uu isaati. Salaanni Islaama keessatti daangaa Islaama fi kufrii (ajaja Rabbii diduu) addaan fooyu. Qur'aanni fi Hadiisni dhugaa kana ifatti mull'isu.

«Salaatota irrattiifi (keessattuu) salaata giddu-galeessa irratti eegamaa, ajajamoo ta'aatii Rabbiif dhaabadhaa»  
(Al-Baqaraah:238)

﴿حَافِظُوا عَلَى الصَّلَوَاتِ وَالصَّلَاةِ الْوُسْطَىٰ وَقَوْمُوا لِلَّهِ قَانِتِينَ﴾

«Mu'uminoonni dhugaan hoffolan (fedha isaanii argatan). Isaan salaatasaanii keessatti (Rabbiin) sodaatan»  
(Al-Mu'uminuun: 1-2)

﴿قَدْ أَفْلَحَ الْمُؤْمِنُونَ، الَّذِينَ هُمْ فِي صَلَاتِهِمْ خَاشِعُونَ﴾

Rabbiin sodaachaafi gadi of-qabaa (Khushuu'i Wal Khuduu'i) kan sagadamu salaanni guutun onnee ibsa, haala namaa nisirreessa, naamuusa qulqulluu (Rabbi) nama barsiisa, waan Rabbiif ta'uu qabanis nama hubachiisa. Salaanni sirriin dhugummaa, amantummaa, ofga'ummaa, obsa, kabajaa, qajeellummaa, wal qixxummaafi haallin gaggaarii biroo nama gonfachiisuuf humna qaba. Salaanni guutun namicha sagade Rabbiin akka sodaatu fi soba, gantummaafi hamtuu namaaf yaaduu irraa akka fagaatan nama godha.

«Salaanni waan fokkataafi jibbamaa hunda irraa nama dhoorga, Rabbiin faarsuun wanta hundarra caala, Rabbiin waan hojjattan hundas nibeeka»  
(Al-Ankabuut:45)

﴿إِنَّ الصَّلَاةَ تَهَيَّأُ عَنِ الْفَحْشَاءِ  
وَالْمُنْكَرِ وَكَذَلِكَ اللَّهُ أَكْبَرُ  
وَاللَّهُ يَعْلَمُ مَا تَصْنَعُونَ﴾

Salaanni bifaafi qabiyyee (ruuhii) qaba. Bifti isaa akkaataa sochii qaamaa kan isaaf heereffamee yoo ta'u, qabiyyeen (ruuhin) isaa ammoo onneen gara Rabbii qajeeluu (deebi'uu) kan mul'isu. Salaanni jimnaastikii qaamaafi ruuhiti. Ruuhin salaatan guddatti. Ilma namaa Rabbii isa uume wajjiin wanti walqunnamsiisus salaata. Salaata dhiisuun yookan dagachuun ammoo Rabbiin addaan cituudha. Rahmata Isaa irraa fagaachun ammoo galata Isaa dhabuudha.

Salaanni sirrii ta'e dhukkuboota onnee kan adda addaatif qoricha sardamaafi qulqulleessaa yakkaati. Akka Abu Hureeyiraan (R.A) galmeessanitti Nabiyyiin (S.A.W) akkana jedhu:-«Balbala tokko tokkoo keessanii irra lagni yaa'u odoo jiraatefi namni tokko laga saniin guyyatti yeroo shan qaama isaa odoo dhiqatee xuriin isarratti nihafaa?» sahaabonnis «Xuriin homaatuu isarratti hin hafu» jechuun deebii kennan. Nabiyyichis «salaanni yeroo shaniis akkasuma -Rabbiin (SW) isaanin maaseta dhiqa.» jedhan.

Walqixxummaafi tokkumaanis salaatan akka gaaritti mul'atu. Kunis namichi waamicha (azaana) godhu «gara salaataa koottaa, gara injifannoo koottaa!» (Hayyaa alas-salaat, hayyaa alal-falaah) jechuun yeroo labsu hawaasa keessatti namoota murtaa'aniif qofa odoo hin ta'in dureessafis, hiyyeessafis, guddaafis, xiqqaafis, namoota taayitaa qabaniifi hin qabneefis hundaafuu godha.

Waamicha dhagahanii yeroo walitti qabamanis salaaticha raawwachuuf kan dhaabbatan sarara (saffii) tokko irratti. Addaan

goodamni hin jiru. Oliy-gadi aantummaan pirotokooliis hin mul'atu. Hunduu gabroota Rabbii waan ta'aniif tokkummaan Gooftaa isaanii kadhata. Imaama tokkoon, qiblaa tokkoon, mana Rabbii keessatti tokkummaafi walqixxummaan dhugaa sababa salaataatiin mul'ata.

«Dhugumatti masjiidonnis kan Rabbii gofa, (isaan keessatti) Rabbiin wajjiin eenyunis hin gabbarinaa.» (Al-jinni:18)

﴿وَأَنَّ الْمَسَاجِدَ لِلَّهِ فَلَا تَدْعُوا مَعَ اللَّهِ أَحَدًا﴾  
 ﴿اللَّهُ أَحَدٌ﴾

«Gooftaa keessan ofgadi qabuunifi dhoksaanis kadhadhaa, waan Rabbi warra daangaa darban hin jaalanneef.» (Al-Ai'raaf:55)

﴿ادعوا ربكم تضرعا وخفية إنه لا يحب المعتدين﴾

## BALAA SALAATA DHIISUU

Rabbiin (SW) salaatatti ajajeera. Utubaaf dhama Islaamaas isa godheera. Nabi Muhammadis (SAW) akkana jedhu:- «Mataan wanta hundaa Islaama. Salaanni utubaa isaati, jihaadni karaa Rabbii irratti godhamu ammoo quuxii (dalluu) islaamati.»

Ibaadawwan hunda dura kan dirqama ta'e salaata. Innis halkan Nabiyyiin gara samii bahan ture. Ee halkan kabajamaa san odoo namni walitti fidu gidduu hin jiraatin Rabbiin (SW) nabiyyicha barbaachisummaa salaatafi dirqama ta'uu isaa qajeellon isaan beeksise. Kanaaf namni salaata beekaa dhiise sadarkaa ajaja Rabbii diduu (kufrii) fi jallina ga'e yookan didaa (kaafira) ta'e jedhama. Dhugaatti namni salaatarraa fagaate Islaamarraa fagaate, Gooftaa isaa dallansiise, nabsee ofii badiif saaxila baase, hojii gaarii isaas balleesse. Ergaa Qur'aanaa kan ifa ta'e irraayis maqe.

«Salaatas, daangawwan guyyaa lamaanifi yeerowwan halkanii eeggadhuu

﴿وَأَنَّ الصَّلَاةَ طَرَفُ النَّهَارِ وَنَزْفًا﴾

raawwadhu, waan hojiin gaariin hojii hamtuu (gadhee) haquuf, kun warra (Rabbiin) faarsaniif yaadannoodha.» (Huum:114)

من الليل إن الحسنات يذهبن السيئات  
ذلك ذكرى للذاكرين ﴿

«...Dhugumatti salaanni gocha badaafi wanta jibbamu hunda irraa nama dhoorga.» (Al-Ankabuut:45)

﴿إن الصلوة تهى عن الفحشاء  
والمكر﴾

«Yeroo tasgabii argattan salaata heera isaa guutaa sagadaa; waan slaanni mu'uminoota irratti dirqama yeroon isaa murtaa'e ta'eef.» (Al-Nisaa'i:103)

﴿فإذا اطأنتهم فأقيموا الصلوة إن  
الصلوة كانت على المؤمنين  
كتاباً موقوتاً﴾

Imaam Ahmadiifi Muslim Jaabiir ibnu Abdullaah (RA) tuqanii akka odeessanitti nabiiyyiin (SAW) akkana jedhu:- «Nama tokkoofi Rabbiin diduu (kufrii) gidduu wanti addaan fooyu salaata dhiisuudha».

Imaam Ahmadiifi warri biroos sahaabaa Bureeyidaa (RA) jedhamu tuqanii akka galmeessanitti nabiiyyiin (SAW) akkana jedhu:- «Nuuf isaan (kaafiroota) gidduu adda addummaan jiru salaata. Namni salaata dhiise dhugaan kafareera.»

Abdullaah ibn Umar (RA) akka odeessanitti, ergamaan Rabbii (SAW) waa'ee salaataa akka kanatti aanun ibsu, «Salaata isaa namni eege<sup>1</sup> ifaa, ragaafi bilisa baasaa isaaf ta'a. Namni salaata hin eegne kamillee ifaa, ragaafi bilisa baasaa hin qabaatu. Gaafa

<sup>1</sup> Salaata namni eege jechuun yeroofi sirnasaa eegee kan sagade jechuu dha.

kaafamaa (qiyaamaa) namoota akka Qaaruum, Fir'oonifi Ubayyi ibnu Kalaf wajjiin kaafama.» (Imaam Ahmadiifi Xabaraanin gabaasan)

Aayatoonni Qur'aanaafi Hadiisonni nabi Muhammad (SAW) kan olitti ibsaman hundi namni salaata dhiise hangam akka balaafi yakka irra jiru ifatti mul'isu. Addunyaa tana irrattis ta'ee aalama dhufutti sadarkaa gadi aanurra ta'uu isaanii mul'isa. Kana irraa ka'uun sahaabonni muraasafi ulamaa'onni heddu namni salaata dhiise kaafira ta'a ilaalcha jedhu qabataniiru. Muraasni isaanii ammoo dirqama ta'uu salaataa namni amaneefi garuu kashilab-bummaa irraa sagaduu dadhabe, fincilaa (faasiqa) ta'a jedhu. Warra birootif fakkeenya badaa akka hin taanes adabniifi hidhaan (hanga sagadutti) itti murtaa'uu qaba yaada jedhu qabu.

Imaamonni mazhabaa garuu namni salaata dhiise ajjeefamuu qaba kan jedhu ijannoo cimaa fudhataniiru. Haafiiz Abdul-Aziim Al-Munzariin akka jedhanitti sahaabonni baay'eenii fi beektonni isaan booda dhufan yeroo salaataa beekaa namni dabarse kaafira akka ta'e hubachiisaniiru. Umar ibnul Khaxxaab, Abdallah ibnu Mas'uud, Abdallaah ibnu Abbaas, Mu'aaz ibnu Jabal, Jaabir ibnu Abdallaahi fi Abuudardaa'i kan jedhaman sahaabonni beekamoon (RA) kanaaf akka fakkeeniyatti lakkaa'amu. Beektota sahaabaa hin ta'in gidduu ammoo Imaam Ahmad ibnu Hanbal, Ishaq ibnu Raahwiih, Abdallaah ibnu Mubaarak, Naha'ii, Haakim ibnu Atiib, Ayyuub Saktiyaanii, Abuu Daawudiifi warri biraas keessatti argamu.<sup>2</sup>

«Muslimoota akka warra maaseta  
hojjatanii waa taasifnaa? isiniif  
(ragaa) maaltu jiraa? Akkamitti  
murtii kennitu?» (Al-Qalam:35-36)

﴿أَتَجْعَلُ الْمُسْلِمِينَ كَالْمَجْرِمِينَ﴾

﴿أَلَمْ يَكُنْ مِنْكُمْ رَجُلٌ كَذِبًا﴾

<sup>2</sup> ("At-Targhiib Wat-Tarhiib")- Haafiz Al-Munzariin.

«Nabseen (namni) hundi waan hojjat-teen qabamti, abbootiin (warreen) mirgaa yoo hafan. (Isaan) jannatoota keessatti walgaggaafatu, waa'ee finciltootaa. Saqar (ibidda Jahannam) keessa maaltu isin galche? (jedhuun). Isaanis:- «warra sagadan irraa hin turre, hiyyeessota kan nyaachisnus hinturre, warra totorra'an wajjiin kan totorraanu turre, Guyyaa Murtiis kan sobsiifnu turree, hanga (yeroon) mirkanaa'e nutti dhufutti» jedhu. (Garuu yeroo sana) araarri araarsitootaa isaan hin fayyadu.»

(Al-Muddassir:38-48)

﴿كُلُّ نَفْسٍ بِمَا كَسَبَتْ رَهِينَةٌ،  
إِلَّا أَضْحَابَ الْيَمِينِ، فِي جَنَّاتٍ  
يَسْأَلُونَ، عَنِ الْمُجْرِمِينَ، بَا  
سَلَكَكَ فِي سَعْرٍ، قَالُوا لِمَ لَكَ  
مِنَ الْمُصَلِّينَ، وَلِمَ لَكَ تُطِمْ  
السَّكِينِ، وَكُنَّا مُخَوِّضَ مَعَ  
الْمُخَافِئِينَ، وَكُنَّا نَكْذِبُ بِسُورِ  
الَّذِينَ، حَتَّى آتَانَا السَّيِّئُ، فَمَا تَنْفَعُهُمْ

﴿شَفَاعَةُ الشَّافِعِينَ﴾

Ibni Mas'uud (RA) akka odeessanitti nabiiyiin (SAW) akkana jedhu:- «Qabannaati utubaaan Islaamaa sadihi -Islaamni kan hundaa'e isaan irratti, Isaan gudduu takkas namni dhiise kaafira (didaa) ta'a Dhiigni isaas halaala ta'a (ni ajjeefama). (Isaanis) Rabbiin malee gabbaramaan akka hin jirre ragaa bahuu, salaatota dirqamaa sagaduufi ji'a Ramadaanaa soomuu.»

(Abuu Ya'ilaan gabaasan)

Warri biroo ammoo dirqama ta'uu salaataa fudhataniit garuu sababawwan dadhabaa ta'an adda addaatin namni hin sagadne fincilaa (faasiqa) ta'a jedhu. Waan ta'eefis hanga sagadutti hawaasa irraa fooyamee hidhamuu qaba -akka fakkeenya badaa hin taane- ijjannoo jedhu qabu. Dursitoonni mazhabaa tokko tokko akka olitti ibsame nama salaata dhiise ajjeesuun dirqama jedhaniiru. Imaam Ahmad, Ishaafi Ibnul Mubaarak kan jedhaman namichi kan ajjeefamu ajaja Rabbii didaa (kaafira) waan ta'eefi yoo jedhan, Imaam Maalik, Shaafi'iifi hiriyyoonni

isaanii ammoo namni salaata dhiise kan ajjeffamu didaa (kaafira) waan ta'eef odoo hin ta'in fincilaa waan ta'eef adabaaf jecha murtii kana dabarsan.<sup>3</sup>

Seerri Islaamaa namoota muslima ta'anii Qur'aanafi Hadiisa nabiyyii fudhatan hundaaf salaata ilaalchisee ijjannoon qabu kanuma. Akka ilaalcha beektota hedduutti namni salaata dhiise kaafira ta'a. Yookanis fincilaa (faasiqa) ta'a. Qur'aanafi Hadiisa keessatti nama salaata dhiise iddoon akkamii akka kennameef ibsineerra. Kanaaf muslimoonni gama salaataatiin ijjannoo laafaa akka hin qabanneefi salaata akka hin dhiifne waamicha godhaa mata duree kana kanumarratti raawwanna.

---

<sup>3</sup> «Biinyatal Mujtahid» Ibni Rashiidin.

## SEENSA

### HUNDEEWWAN IIMAANAA

Hundeewwan iimaanaa kan amantii Islaamaa jahatti qoodamu.  
Isaanis:-

((قال فأخبرني عن الإيمان قال أن تؤمن بالله، وملائكته، وكتبه، ورسوله،  
واليوم الآخر، وتؤمن بالقدر خيره وشره..)) رواه مسلم.

1. Tokkummaa Rabbiitti amanuu, kan hin dhalleefi hin dhalanne, akkasumas Uumaa aalamaa kan hiriyyaa hin qabne ta'uu Isaa amanuu yookan fudhachuu;
2. Hojiif waan Rabbi isaan ajajerratti ciminaan kan socho'an, ifaa irraa kan uumaman, kan hin nyaannefi hin dhugne, saala (dhiirummaafi dhalummaa) kan hin qabne uumamtoonni "malaa'ikota" jedhaman jiraachuu amanuu;
3. Rabbiin (SW) nabiyootafi ummatoota isaanii kan yeroo adda addaa ergeef qajeelfama akka ta'u macaafota (kitaabota) kan buuse ta'usaa amanuu;
4. Rabbiin (SW) ilmaan namaa barsiisufi daandii qajeelaa itti argisiisuuf zabana adda addaa gosa, lammiifi saboota gara garaa irraa akkasumas hawaasa addunyaa keessatti kan erge ergamtoonni (rusuloonni) heddu jiraachuu amanuufi dhugaa dubbattoota ta'uu isaaniis qeebaluu;
5. Jireenyi aalama adduniyaa kana keessatti qofa argamtee kan dhabamtu odoo hin ta'in du'a boodas jireenyi zalaalamii akka jiruufi walitti qabatti du'anii ka'uun (aakhiraan) akka jiraatu amanuu;



6. Wanti hundi kan ta'uufi raawwatamu beekumsaafi too'annaa akkasumas murtii Rabbii qofaan akka ta'e (qadaa'i fi qadaritti) amanuu dha.

## HUNDEEWWAN ISLAAMAA

Hundeewwan Islaamaa shanitti qoodamu. Isaanis:-

((..وقال يا محمد أخبرني عن الإسلام. فقال رسول الله صلى الله عليه وسلم:  
(أركان) الإسلام أن تشهد أن لا إله إلا الله وأن محمدا رسول الله، وتقيم  
الصلاة، وتؤتي الزكاة، وتصوم رمضان وتحج البيت إن استطعت إليه سبيلا))  
رواه مسلم.

1. Rabbiin malee gooftaan biraa kan hin jirre ta'uufi nabi Muhammad ergamaa Isaa ta'uu ragaa bahuu;
2. Guyyatti yeroo shan salaata fardii sagaduu;
3. Zakaa (hirphaa dirqamaa) baasuu;
4. Waggatti ji'a tokko -ji'a Ramadaanaa- soomuu;
5. Mana Rabbii kan "Makka" jiru -Ka'ibaa- yoo danda'ame umrii keessatti al tokko dhaquufi sirna hajjii raawwachuu.

Umar (RA) akka odeessanitti:- «guyyaa tokko ergamaa Rabbii (SAW) wajjiin bakka teenyetti namichi uffata akkaan adii uffate, kan mataan isaa akkaan gurraachaa, kan malkatni imaltuu irraa hin mul'anneefi kan nu keessaa namni tokkos hin beekne dhufee jilba isaa jilba nabiyyichaatti dhaabee taa'e. Ganaa harkasaa ammoo jilba ufii irra kaa'e. "Yaa Muhammad! waa'ee Islaamaa natti himi" jedheen. Ergamaan Rabbillee (SAW) "Islaamni Rabbiin malee gooftaan biraa akka hin jirreefi Muhammad

ergamaa Isaa ta'uu ragaa bahuu, salaata yeroofi sirna isaanii eegdees sagaduu, hirphaa dirqamaa (zaka) kennuu, ji'a Ramadaanaa soomuu, yoo danda'ame mana Rabbii dhaqanii daaw'achuudha" jechuun deebisaniif. (Gaafataanis) "dhugaa keeti" jedhe. Nutis gocha namichaa kanaan ni dinqisiifamne-ofumaa gaafatee dhugaa dubbatte jechuunii isaatif. Itti aansees "waa'ee iimaanaa natti himi" jedheen. Isaanis "Rabbitti, malaa'ikota Isaatti, kitaabota Isaatti, ergamtoota Isaatti, guyyaa xumuraa fi qadaratti -gaaris ta'ee badaa- amanuun iimaana jedhama" jedhaniin. "Dhugaa keeti" jedheet ammas "waa'ee <ihsaan> natti himi" jedheen. "Rabbiin akka waan argituutti gabbaruudha, yoo ati Isa hin arginis Inni waan si arguuf" jedhaniin. "Waa'ee yerotti (guyyaa murtii) natti himi" jedheen. "Gaafatamaan gaafataa caalaa beekumsa isii hin qabu" jedhaniin. "Tolee waa'ee malkatoota isii natti himi" jedheen. "Dubartiin gabraa gooftittii isii deetti, hiyyeeyyin kopheefi uffata hin qabne kan tiiksee turan darbii (fooqii) gugurdaa ijaaruuf yoo wal dorgoman argita" jedhaniin. Sana booda (gaafataan) ni deeme. Sana booda yeroo gabaabaa (guyyaa 3) erga turree booda Ergamaan Rabbii (SAW):- "Yaa Umar gaafataan eenyu akka ta'e beekte moo?" naan jennaan "Rabbiif ergamaa Isaatu beeka" jedheen. "Inni Jibriili, kan dhufe amantii keessan isin barsiisufi" jechuun naaf deebisan.» jedhan Umar (RA)

(Muslimtu gabaase)

# **KUTAA TOKKOFFAA**

## **SALAATAAF QOPHII DURAA**

### **WUDUU'A DURA**

Namni tokko erga fincaan yookan sagaraa bahee booda "istinjaa"<sup>4</sup> gochuu qaba.

### **RIGAA (SIWAAKA)**

Wuduu'a odoo hingoone dura ilkaan rigaan yookan buruushii ilkaanitiin qulqulleessuun muuxannoo gaarii dha. Xuraayuu ilkaanii irraa dhukuboota dhufan hedduu dhoorkuun kan danda'amu karaa kanaan waan ta'eef. Kana malees siwaakni sunnaa nabi Muhammadi (SAW).

Aayyoo Aa'ishaan (RA) akka ibsametti ergamaan Rabbii (SAW) «rigaa ilkaanitti fayyadamuun karaa afaan ququlleessutiifi Gooftaa gammachiisuti» jedhaniiru.

(Ahmad, Daaramiifi Nasaa'iin gabaasan)

Nabi Muhammad (SAW) «ummata kiyatti ulfaachuun isaa odoo natti dhagahamuu baatee yeroo salaataa kamillee wuduu'a dura rigaatti akka fayyadaman isaan ajaja ture» jechuun isaanii galmeeffameera.

### **WUDUU'AAF YAADUU (NIYYACHUU)**

Wuduu'a gochuu jalqabuun duratti isaaf yaaduun (niyyachuun) barbaachisaadha. "Niyyaan" kan godhamu onnee keessatti ta'uu qaba.

---

<sup>4</sup> "Istinjaan"- fincaan ykn sagaraa erga bahanii booda qaama qulqullinaa waraqaanifi bishaaniin ykn bishaan qofaan ykn waraqa qofaan qulqulleeffachuudha.

Jechaan (dubbachaa) niyyachuu nabi Muhammad (SAW) waan hin mirkaneessiniif wuduu'a godhachuuf onnee keessatti erga yaadanii booda «Bismillaah» jedhaa jalqabaa. Kunis "maqaa Rabbiitin jalqaba" jechuudha.

## **AKKAATAA WUDUU'AA**

1. Harka lamaan hanga kiiyootti (hidhannaa sa'aatitti) iddoo gogaa tokkos odoo hin hanbifne sirritti dhiqadhaa.
2. Bishaan ganaa harka mirgaatti fudhachuun afaan keessan shafadhaa.
3. Funyaan keessan qulqulleeffadhaa- bishaan ganaa harka mirgaatti qabachuun funyaan keessaniin olharkisaa, harka bitaatin ammoo funyaan keessan qabaa deebisaa gadi dhiibaa.
4. Fuula keessan dhiqadhaa- gurra keessan tokko irraa hanga gurra lamuu, adda keessan daangaa olii irraa hanga areedatti fuula keessan irratti iddoo gogaa odoo hin hanbifne dhiqadhaa.
5. Kana booda harka lamaan (mirga dursiisuun) hanga ciqileetti oddo iddoo gogaa homaatuu hin dhiisin dhiqadhaa. (Ciqilerra xinnoo ol dabarsuun filatamaadha).
6. Mataa keessan akka kanatti aanutti haxaayaa- qubbeen keessan bishaaniin jiisaa. Ergasii adda keessanii olii jalqabdaniin hanga qucee (qolomata) gahutti, ergasiis hanga adda keessan gahutti gara fuunduraa deebisuun mataa keessan harkaan haxaayaa.
7. Qubbeen mul'istuu keessan bishaaniin jiisuun gurra lamaan keessan keessa seensisaa gurra keessan qulqulleessaa. Dachaa gurraa kan alaas qulqulleessaa. Duuba gurra keessanii jalaa gara olii harkaan haxaayaa.

8. Luka lamaan keessan hanga kiiyootti (mirga dursiisuun) dhiqadhaa. Luka keessan irratti keessattuu qubbeen keessan gidduutti iddoon gogaan homaattuu hafuu dhabuu mirkaneessaa.

## SIRNA ADDAA KAN WUDUU'AA

Luka keessan yeroo murtaa'ef bishaan tuqsiisuu yoo hin barbaadin, dura wuduu'a guutuu godhaatii "jawuraba"<sup>5</sup> (khuffii) kaawwadhaa. Sana booda nama imala hin bahin yoo ta'e sa'aatii 24f yeroo wuduu'a godhattan luka irra yoo geettan gubbama harka jiidhaan haxaayuun ni ga'a. Imaltuu (nama karaa deemaa jiru) yoo taatan ammoo guyyoota sadihiif bifa kanaan fayyadamuu ni dandeettu. Yeroon murtaa'e kun erga xumuramee booda garuu wuduu'a guutuu (luka dabalatee) godhachuu qabdu. Akkasumas qaamota wuduu'af dhiqaman keessaa tokko irra madaan yoo jiraatefi qaama sana dhiquun miidhaa kan fidu yoo ta'e madichi waccuu qulqulluun hidhamee waccuu sana harka jiidhaan haxaayuun ni danda'ama.

Mughiiraa ibni Shu'ibaa akka odeessanitti «Nabiyyiin (SAW) wuduu'a erga godhatanii booda jawurabootafi kopheewwan isaanii haxaayaniiru» jedhaniiru.

(Ahmad, Tirmiiziin, Abuu Daawudiifi Ibn Maajaah gabaasan)

Nabi Muhammad (SAW) yeroo wuduu'a godhatan mataafi gurra lamaan malee qaamota biraa al tokko, lama yookan sadi deddeebisuun dhiqataniiru. Yeroo sadihii ol garuu dhiqatanii hin

---

<sup>5</sup> "Jawurab"- kun zabana durii kophee keessan luka irratti kan godhatamu ykn waan akka kaalsiti. Furdaafi kan salphatti bishaan hin galchine. Kaalsii laastikii furdaa fakkaataa jechuun ni danda'ama.

beekan. Mataafi gurra kan quyyifatan garuu yeroo kamillee al tokko tokko qofa.

Amri ibni Shu'eeiyib abbaa isaanii, akaakayyuu isaanii tuquun nabi Muhammad (SAW) «namni kamillee wuduu'a yeroo sadihii oliif yoo deddeebisee dhiqate dogoggora raawwate, seera cabse, hamtuu (daba) hojjate.» jechuu isaanii dubbataniiru.

(Nasaa'ifi Ibni Maajaah gabaasan)

## DU'AA'II WUDUU'A BOODA GODHAMU

Ashihadu an laa ilaaha illallaah waahdahuu laa-shariika lahuu wa ashihadu anna Muhammadan abduhuu wa rasuuluhuu. أشهد أن لا إله إلا الله وحده لا شريك له وأشهد أن محمدًا عبده ورسوله

(مسلم)

**Hikkaa**:- «Rabbiin malee gooftaan biraa jiraachuu dhabuufi Rabbi tokkichaafi gargaaraa kan hin qabne ta'uu ni mirkaneessa. Muhammadis (SAW) gabrichaafi ergamaa Rabbii ta'uu ni mirkaneessa.» (Muslim gabaasan)

Itti fufees akkana haa jedhu:-

Allaahumma ij'alnii minat-tawwaabiina waj'alnii minal mutaxahhiriin. اللهم اجعلني من التوابين واجعلني من المتطهرين

(مسلم)

**Hikkaan**:- «Yaa Rabbi! warra gaabban (gara kee deebi'an) irraa nu godhi, warra qulqullaa'an irraayis nu taasisi.»

(Tirmiiizin gabaasan)

## TAYAMMUMA (WUDUU'A GOGAA)

Bakka bishaan hin argaminitti, yookan bishaan argame dhugaatii irraa yoo hin hafin yookan ammoo bishaanin dhiqachuun fayyaa irratti yoo miidhaa kan fidu ta'e tayammuma (wuduu'a gogaa) godhachuun ni danda'ama.

«...Yoo bishaan kan hin arganne ta'e biyyee (ashawaa) qulqulluu fudhaatii fuulaafi harkeen keessan haxaayaa. Kanaan Rabbiin rakkina keessa isin galchuu hin fedhu. Inni isin qulqulleesufi jaalala Isaas isin irratti guutuu barbaada malee. Akka Isa galateeffattaniif jecha.»

(Al-Maa'idaah:6)

﴿.. فَلَمْ تَجِدُوا مَاءً فَسَيِّمُوا صَعِيدًا طَيِّبًا  
فَانْسَحُوا بِوُجُوهِكُمْ وَأَيْدِيكُمْ مِنْهُ  
مَا يُرِيدُ اللَّهُ لِيَجْعَلَ عَلَيْكُمْ مِنْ حَرَجٍ  
وَلَكِنْ يُرِيدُ لِيُطَهِّرَكُمْ وَلِيَسْتَعْتَبَ  
عَلَيْكُمْ لَعَلَّكُمْ تَشْكُرُونَ﴾

### SIRNA TAYAMMUMAA :-

- A) Onnee keessatti yaadaa (niyyadhaa).
- B) Maqaa Rabbiitin Jalqaba- «Bismillaahir-Rahmaanir-Rahiim» jedhaa.
- C) Ganaa harka lamaanitiin ashawaa ykn biyyee ykn ashawaafi dikee waan ofirraa qaban (akka jidaaraa (gidgiddaa), dhagaa, kkf) dhadhayaa. Sana booda ganaa keessan lamaan gara daangatiin walitti fidaatii ganaa lamaaniin fuula keessan haxaayaa. Itti aansatiin ganaa bitaatin harka mirgaa, ganaa mirgaatin ammoo harka bitaa hanga ciqilee gahutti -haxaayaa.
- D) Kadhaa (du'aa'ii) wuduu'a booda godhamu qara'uudhaan wuduu'a keessan xumuraa. (Bukhaariifi Muslim gabaasan)

# KUTAA LAMMAFFAA

## YEROO, BAKKA, UFFATAA FI BIFA SALAATAA

### YEROO SALAATAA

Tokko tokkoon salaataa yeroon isaa akka ga'een yookan yeroo isaaf murtaa'e keessatti raawwatamuu qaba. Guyyaa guyyaan akka sagadman dirqama kan godhaman salaata shantu jira.

#### **1. Salaata Fajrii (Subhii):-**

Salaanni fajrii (Subhii) barraaqa (xababbara) yeroo ifnanti (fajriin) Bahaan mul'atte irraa jalqabee hanga aduun baatutti sagadama.

#### **2. Salaata Zuhrii (Waaree):-**

Salaanni zuhrii yookan waaree yeroon isaa wayita aduun walakkaa guyyaa irraa xinnoo gara Dhihaa dabde irraa jalqabee hanga yeroo gaaddidduun waa hundaa dhaabbata waan sanaatin qixxaayutti tura. Walakkaa guyyaa aduu yoo laallu sirrii sammuu (mataa) keenyatiin mul'atti. Yeroo sana gaaddidduun keenya luka keenya jala oola. Haa ta'u malee yoo aduun gara Dhihaa dabde gaaddidduunis luka jala bahee gara Bahaatin mul'achuu jalqaba. Yeroon zuhriis wayita sanaa kaaseeti. Gara Dhihaatti dabaa deemuu aduu wajjin gaaddidduun luka keenya jalaa bahee dhaabbata (dheerinna) keenyan yoo walqixxaa'e yeroon salaata zuhrii sanarratti xumurama.

Akka Jaabir ibni Abdullaah odeessanitti:- «Mal'aak Jibriil nabi Muhammad (SAW) bira waaree booda dhufheet (zuhrii sagadi) jedheen. Ergamaan Rabbillee (SAW) ka'aniit zuhrii sagadan. Ergasii boodas mal'aak Jibriil deebi'ee waaree booda turee dhufheet «ka'ii asrii (salaata saafayaa) sagadi» jedheen. Sana booda



nabi Muhammad (SAW) yeroo gaaddidduun waa hundaa dheerinna wanta sanaatin qixxaa'utti salaata "asrii" sagadan. Ammas gaafa itti aanu nabi Muhammad (SAW) ka'aniit yeroo gaaddidduun waa hundaa dheerinna wanta saniitin qixxee turetti salaata zuhrii sagadan. Ergasii Jibriil deebi'ee yeroo asrii (salaata saafayaa) dhufheet (ka'ii slaata asrii sagadi) jedheen. Nabiiyiinis yeroo gaaddidduun waa hundaa dachaa dheerinna isaa turetti salaata asrii sagadan. Sana booda Jibriil guyyoota walitti aanan lamaaf dhufee nabi Muhammad (SAW) wajjiin erga sagadee booda yeroon salaata zuhriifi asrii wayitii iddoo kana lamaani ta'uu dubbate.»

(Ahmad, Nasaa'ii, Tirmiiziifi Bukhaariin gabaasan)

Kitaaboleen salaataa heddu gaaddidduun waa hundaa yoo dheerinna isaa dachaa lama ta'e yeroon salaata zuhrii kan xumuramuufi yeroon salaata asrii kan jalqabamu ta'uu mul'isu Garuu jechi kun Hadiisa Mal'aak Jibriil guyyaa duraa dhufee gaaddidduun waa hundaa dheerinna wantichaa wajjiin yeroo walqixxaatu nabi Muhammad (SAW) salaata asrii akka sagadan gaafateefi yeroo sagadan kan ibsu hadiisa olitti odeeffameen wajji wal dhaba. Kunis dhuma yeroo salaata zuhriiti jechuudha. Yeroon isaa odoo hin geenne salaata sagaduun kan hindanda'amne ta'uu kanuma keessa odoo hin yaadachiifne hin dabarru.

### **3/ Salaata Asrii (Saafayaa):-**

Yeroon salaata asrii kan jalqabu gaaddidduun wanta tokko dheerinna isaa wajjiin yoo walqixa ta'u. Kan xumuramu ammoo yeroo aduun seensaaf taatu.

Salaata asrii yeroo aduun seensaaf kaloofte sagaduun kan danda'amu ta'us, salaata kan hanga yeroo saniitti duubatti harkisuun garuu haala munaafiqootaa akka ta'e nabiiyiin (SAW) addeessaniiru.

#### **4/ Salaata Maghriibaa (Dhihaa):-**

Yeroon salaata maghriibaa wayita aduun seente irraa jalqabee yeroo dimimmisni diimaan badu xumurama.

#### **5/ Salaata Isha'a'i (Galgalaa):-**

Wayitiin salaata isha'a'i (galgalaa) yeroo dimimmisni diimaan bade irraa jalqabee xinnoo halkan qixxee dura xumurama. Salaata kana hanga dimimmisni barraaqaa (fajriin) bahutti sagaduun danda'amus, halkan qixxee dura sagaduun garuu filatamaadha.

## YEEROWWAN SALAANNI KEESSATTI DHOORGAME

Uqbaa ibni Amri (RA) akka odeessanitti:- «Salaata akka hin sagadneefi reeffa akka hin awwaalle ergamaan Rabbii (SAW) kan nu dhoorgan yeroo sadihi. Isaanis:-

- Yeroo aduun bahuu jalqabde, hanga guutuu guututti baatutti.
- Yeroo aduun qixxee samii geette, hanga gara Dhihaa dabduutti.
- Yeroo aduun seensaaf kaloofte, hanga seentutti.»

(Muslim gabaasan)

## SALAATA IDAASAA (NAFLII) SAGADUUN YEROO KEESSATTI DHOORGAME

Akka Abuu Sa'iid Al-Khudriin (RA) gabaasanitti:- ergamaan Rabbii (SAW) «salaata fajrii booda hanga aduun baatutti yookaan salaata asrii booda hanga aduun dhiitutti (seentutti) salaanni homaatu hin sagadamu» jechuu isaanii ibsaniiru.

(Bukhaariifi Muslim gabaasan)

Yeroo kanatti kan dhoorgame salaata naflii (dabalataa) qofa yoo ta'u salaata fardii kan nama jalaa dabre (qadaa) sagaduun ni danda'ama. Beektonni muslimaa harki caalu "qadaa" salaata

dirqamaa (fardii) yeerowwan olitti tuqamanitti (salaata asriifi fajrii booda) sagaduu hadiisa kanatti aanu ragaa godhachuun hayyamaniiru.

Nabi Muhammad (SAW) «namni slaata dagate yeroo yaadatetti sagaduu qaba» jedhaniiru.

Akka Abuu Hureeyiraan (RA) odeessanitti ergamaan Rabbii (SAW) akkana yoo jedhan dhagahameera. «Erga iqaamaan godhamee booda salaata iqaamaan godhameef (kan fardii sana) malee salaanni biraa nafliis ta'ee sunnaa hin sagadamu.»

(Ahmadiifi Muslim gabaasan)

## **BAKKA SALAANNI ITTI SAGADAMU**

Ibaadaa dalaguuf yookan salaata sagaduuf manni yookan bakki nama fayyadu "masjiida" jedhama. Akka hadiisa keessatti ibsametti dachiin hundi (qulqulluufi xahaaraa erga ta'ee) masjiida jedhama. Kana jechuun muslimni tokko masjiidan ala bakka jirutti sagaduu ni danda'a jechuu yoo ta'ellee mindaan salaata masjiida keessatti sagadamuu kan bakka biraatti sagadamu irra daran caala. Bakki salaata itti sagadamu yoo filatamu dhimmoonni kanatti aanan ilaalcha keessa galuu qabu.

a) Bakki filatamu qulqulluufi xahaaraa ta'uu qaba: Bakka xuraayafi qulqulluu hin ta'in fkn. kosii, bakka qalmaa fi foonaa horii irratti sagaduun dhoorgamaadha.

b) Bakki salaataf filatamu balaa jalaa kan dhokate ta'uu qaba. Kana jechuun namni yookan wanti isa jeequ (rabbashu) wahii yoo jiraate achirraa fagaachuu qaba jechuudha.

- c) Daandii namni qaxxaamuru irratti sagaduun sochii namootaa kan dhoorgu waan ta'eef daandii muummee, karaa fi iddoo namoonni qaxxaamuranitti sagaduun dhoorgamaadha.<sup>6</sup>
- d) Mana Rabbii (Ka'ibaa) sammuu irratti sagaduun dhoorgamaadha.
- e) Awwaala irratti yookan gara awwaalaa gara galanii sagaduun dhoorgamaadha.

## UFFATA SALAATAA

### Dhiirotaaf:-

- a) Uffanni salaataa kan dhiiraa xiqqaatee qaamota handhuurafi mogolee gidduu jiran dhoksuu qaba.
- b) Gateettiwwan yoo dhoksaman filatamaadha.
- c) Kittaa (mudawwara) yookan uffata biraa kan handhuura irraa hanga mogolee, akkasumas gateettiwwan (gateettiwwan irra hanga mogolee) dhoksuu danda'uun sagaduun ni danda'ama. Ergamaan Rabbii (SAW) akkana jedhu:- «Eennullee uffata baaltokkee (naxalaa) kan gateettiwwan irratti dachaafamuu hin dandeenyeen hin sagadinaa.» (Bukhaariifi Muslim gabaasan)

Ta'ullee, yoo uffatichi gateettiwwan dhoksuuf kan hin geenne ta'e xinnaatee qaamni gidduu handhuurafi mogolee jiru uwwifamuun dirqama ta'a.

---

<sup>6</sup> Yoo salaata jam'aan sagadamu fkn. Salaata ((Jum'aafi Iidaa)) ta'ee namni sagadu hedduu ta'eefi bakki yoo dhiphate karaa irratti sagaduun ni danda'ama. Yeroo kana garuu konkolaataaleen dhaabbachuú qabu. Nama sagadu qaxxaamuruu hin qabnu.

## **Dubartootaaf:-**

Uffanni yookan qamisiin dubartii fuulafi harka malee qaama isii hunda mataa irraa hanga lukaa kan dhoksu ta'uu qaba. Salaanni uffata haphii qaama namaa mul'isuun sagadame gatii hinqabu. Akkasuma uffata naffatti nama qabatee fakkii qaamaa mul'isu dhabamsiisuu barbaachisa.

## **BIFA SALAATAA**

### **SALAATA FARDII YOOKAN DIRQAMAA**

Salaanni "fardii" isa sagaduun dirqama ta'e. Namni Rabbitti (Allaahitti) amane (mu'uminni) kamillee salaata guyaatti alshan akka sagadaman dirqisiifame akka sagadu Rabbi isa ajajeera. Salaata fardii shanan keessaa tokkos sagaduu dhiisuun yakka guddaa nama adabsiisu fida.

### **SALAATA "NAFLII" YOOKAN DABLATAA**

Salaanni "naflii" walii galatti isaan nabiiyiin (SAW) salaata fardii dura yookan duuba yeerowwan addaafi kophaa sagadan yoo ta'an isaanis salaata fedhaan raawwatamaniidha. Salaanni naflii isaan nabiiyiin (SAW) muslimoonni akka sagadan irratti muslimoota kakaasan kan dabalataati.

Salaata naflii bakka saditti qoodun ni danda'ama.

#### **a) Sunnatul Mu'akkadaah (Salaata Sunnaa Jabaa)**

Nabiiyiin ulfaataan (SAW) ilaalcha kan kennaniififi yeroo hunda salaata fardii dura yookan duuba kan sagadan salaatonni dabalataa "sunnatul mu'akkadaah" jedhamu.

#### **b) Sunnatu Gheeyirul Mu'akkadaa (Salaata Sunnaa Jabaa Hin Ta'in)**

Nabiiyiin (SAW) darbee darbee qofa kan sagadan salaatonni dabalataa "gheeyirul mu'akkadaah" jedhamanii beekamu.

**c) Salaata Naflii (Dabalataa)**

Salaanni naflii yoo sagadame mindaa (badhaasa) qaba. Yoo dhiisame garuu miidhaa (maasetta) hin qabu. Yeroo fi dandeettii mu'uminichaa irratti hundaayee wayitii barbaadame sagadamuu danda'a. Nabi Muhammad (SAW) hirdhina xixinnaa salaata fardii keessatti dhalatan akka bakka bu'uuf salaata naflii akka sagadan muslimoota jajjabeessaniiru.

**BAAYINA RAKA'AA SALAATOTA  
FARDII SHANANII**

**a) Salaata Fajrii:-**

Dura salaata sunnaa jabaa raka'aa lama, sana booda raka'aa lama salaata fardii.

**b) Salaata Zuhrii:-**

Dura raka'aa lama yookan afur sunnaa jabaa qaba. Ergasii salaata fardii raka'aa afur, duubarra raka'aa lama sunnaa mu'akkadaa (jabaa).

Akka ibni Umar (RA) odeessanitti:- «Ergamaa Rabbii wajjiin taanee zuhrii yoo sagadnu (nabiyyiin) fardii dura raka'aa lama, fardii booda ammoo raka'aa lama sagadeera.» jedhaniiru.

(Bukhaariifi Muslim gabaasan)

Zuhrii odoo hin sagadne dura sunnaa raka'aa afur sagaduun waan yeroo hunda baratame. Ta'us hadiisni olitti ibsame kan mul'su zuhrii odoo hin sagadne dura sunnaa raka'aa lama sagaduun kan danda'amu ta'uusaati.

**c) Salaata Asrii:-**

Dura sunnaa jabaa hin ta'in (gheeyirul mu'akkadaa) raka'aa lama yookan afur, sana booda raka'aa afur fardii. Akka sahaab Aliin (RA) odeessanitti:- «Ergamaan Rabbii (SAW) salaata asrii

dura lama lama qooduun raka'aa afur sunnaa sagadaa turan» jedhaniiru  
(Tirmiizii)

Akkasumas Aliin (RA) hadiisa biraa keessatti:- «Ergamaan Rabbii (SAW) salaata asrii dura sunna raka'aa lama sagadaa turan» jedhaniiru.  
(Abuu Daawud)

**d) Salaata Maghriibaa:-**

Dura naflii raka'aa lama' fardii raka'aa sadi, sana booda sunnaa jabaa raka'aa lama.

Abdullaah ibni Mughaffil (RA) nabiiyiin (SAW) yeroo sadi deddeebisanii «Salaata maghriibaa dura sagadaa» erga jedhanii booda «Kunis (sagaduuf) warra fedha qaban kan ilaalu» jechuu isaanii ibsaniiru. Sababaan kana jedhaniif akka namoonni sunnaa jabatti lakkaa'an hawwii waan hin qabneef ture.

(Bukhaariifi Muslim gabaasan)

**e) Salaata Ishaa'ii:-**

Fardii raka'aa afur, ergasii raka'aa lama (naflii) fi raka'aa sadii (raka'aa witrrii) sagaduun salaanni muummeyyiin guyyaa raawwatamanii xumuramu.

Ibni Umar (RA) akka odeessanitti:- Ergamaan Rabbii (SAW) «witrrii xumura salaata ishaa'ii keessan godhaa» jedhaniiru.

(Miishakaat)

# **KUTAA SADAFFAA**

## **AZAANA FI IQAAMAA**

### **SEENAA JALQABAMA AZAANAA**

Muslimoonni Makaarraa gara Madiinaa erga godaananii booda salaanni jama'aan (woliinii) bakka tokkotti yeroo hayyamame sagadamuu akka qabu murtaa'eera. Ta'ullee yeroo tokko tokko keessattuu yeroo hojiin baay'atu wayita salaata jama'aa garii yaadachuun isaan rakkisa ture.

Guyya gaafa tokkoo nabi Muhammad (SAW) fi sahaabonni isaanii yoo yeroon salaata tokkoo gahu waa'ee namoota gara salaata jama'aa waamuu mari'atanii turan. Mu'uminoonni gariin waamichaaf akkuma Kiristaanotaa bilbila dhageessisuu wayya yoo jedhan gariin amoo xurumbaa Yahuudotaa filatanii turan. Sahaab Umar (RA) garuu namni salaanni gahuu odessu akka ergamu yaada jedhu dhiyeessan. Kana booda ergamaan Rabbii (SAW) Bilaalin akka namoota gara salaataa waamu ramadanii turan. Ta'us malli kun quubsaa ta'ee waan hin argaminiif nabi Muhammad (SAW) waan "naaqus" jedhamu kan bilbila Kiristaanotaatin wal fakkaatutti fayyadamuuf waliigalan. Ta'us bilbila Kiristaanotaatin wal fakkaachuu isaa qalbiin isanii hin jaalanne. Filannoo garuu hin qaban ture. Kanaaf nabiiyyiin (SAW) namoota gara salaataatti wamuuf akka danda'amu bilbilli akka hojjatamu ajajan. Garuu guyyama sana wanti biraa dhalate.

Abdullaah ibni Zeeyid ibni Abdi Rabbih sahaabaan jedhaman akkana jedhan:- «Rafee ture. Abjuun nama "naaquusa" harka isaatin qabate tokko argeetin "yaa gabricha Rabbii! kana natti gurgurtaa?" jedheen. Maal gochuu akka fedhe nagaafannaan namoota gara salaataa waamuuf akka itti fayyadamnu itti hime. Innis "ergasuu waan kana caalu sitti himuu?" naan jedhe. Anis



deebisee "ee natti himi" jennaanin jecha asii gadii akka jedhu na gaafate.

Allaahu akbar, Allaahu akbar,  
Allaahu Akbar, Allaahu akbar.  
Ashahadu an laa ilaaha illallaah,  
Ashahadu an laa ilaaha illallaah.  
Ashahadu anna Muhammadan  
rasuulullaah, Ashahadu anna  
Muhammadan rasuulullaah. Hayya  
alas-salaah, Hayya alas-salaah.  
Hayya alal falaah, Hayya alal  
falaah. Allaahu akbar, Allaahu  
akbar, Laa ilaaha illallaah.

الله أكبر الله أكبر، الله أكبر الله أكبر،  
أشهد أن لا إله إلا الله، أشهد أن لا  
إله إلا الله، أشهد أن محمداً رسول  
الله، أشهد أن محمداً رسول الله، حى  
على الصلاة، حى على الصلاة، حى  
على الفلاح، حى على الفلاح، الله  
أكبر الله أكبر، لا إله إلا الله.

Azaanicha olitti ibsame booda, namichi keessummaa xinnoo erga cal'isee turee booda «namoonni sagadan erga guutamani walitti qabamani booda ammoo akkana jechuu qabda» naan jedhe:-

Allaahu Akbar, Allaahu akbar.  
Ashahadu an laa ilaaha illallaah.  
Ashahadu anna Muhammadan  
rasuulullaah. Hayya alas-salaah,  
Hayya alal falaah. Qad qaamatis-  
salaah, Qad qaamatis-salaah.  
Allaahu akbar, Allaahu akbar, Laa  
ilaaha illallaah.

الله أكبر الله أكبر، أشهد أن لا إله  
إلا الله، أشهد أن محمدا رسول الله،  
حى على الصلاة، حى على الفلاح،  
قد قامت الصلاة قد قامت الصلاة،  
الله أكبر الله أكبر، لا إله إلا الله.

Barii sana abjuu arge kana ergamaa Rabbiitti (SAW) yoon himu "Yoo Rabbii jedhe abjuu dhugaati. Kanaaf waan argite hunda Bilaalin erga barsiiftee booda inni waan sicaalaa sagalee qabuuf yeroo salaataf waamicha godhu haa itti fayyadamu" jedhan. Anis Bilaalin barsiisuu jalqabe. Innis salaataf waamicha (azaana) godhe. Umar ibni Al-Khaxxaab (RA) mana isaanii ta'anii

azaanicha dhageennaan kobbortaa isaanii gubbaan uffataa dhufaniit "Yaa ergamaa Rabbii Gooftaa dhugaan isin ergetti kakadhee anis waanuma (azaana) kanaan tokko ta'e arge" jedhaniin. Ergamaan Rabbillee (SAW) "*alhamdu lillaah* (faarun kan Rabbiiti)" jedhan.»

(Ahmad, Ibni Maajaah fi Tirmiiziin gabaasan)

## MU'AZZINA (AZAANA GODHAA)

Namni gara salaata jama'aa (woliinii) namoota waamu mu'azzina yookan azaana godhaa jedhama. Namni kun azaana odoo hin goone dura fuula isaa Makkaatti kan argamu gara Ka'ibaa yookan qiblaa garagalchuu qaba. Harka isaa lamaan ol kaasudhaan qubbiin muliftuu isaa qaawwa gurra isaa lamaan keessa suuqudhaan sagalee isaa ol kaasee azaana gochuu qaba. Wayita azaana godhus yeroo "*hayya alas-salaah*" jedhu fuula isaa gara mirgaa, yoo "*hayya alal falaah*" jedhu ammoo fuula isaa gara bitaa gara galchuu qaba. Nama kophaa sagaduufis yoo ta'e sagalee ol fuudhamaan azaana gochuun sunnaadha.

## JECHA GUUTUFI QABIYYEE AZAANAA

Allaahu akbar, Allaahu akbar,  
Allaahu Akbar, Allaahu akbar.  
Ashahadu an laa ilaaha illallaah,  
Ashahadu an laa ilaaha illallaah.  
Ashahadu anna Muhammadan  
rasuulullaah, Ashahadu anna  
Muhammadan rasuulullaah. Hayya  
alas-salaah, Hayya alas-salaah.  
Hayya alal falaah, Hayya alal  
falaah. Allaahu akbar, Allaahu  
akbar, Laa ilaaha illallaah.

الله أكبر الله أكبر، الله أكبر الله أكبر،  
أشهد أن لا إله إلا الله، أشهد أن لا  
إله إلا الله، أشهد أن محمدا رسول  
الله، أشهد أن محمدا رسول الله، حى  
على الصلاة، حى على الصلاة، حى  
على الفلاح، حى على الفلاح، الله  
أكبر الله أكبر، لا إله إلا الله.

### **Hiikkaa:-**

Rabbi waan hundarra guddaadha (*veroo 4*)

Rabbiin malee gooftaan biraa akka hin jirre ragaa baha. (*veroo 2*)

Muhammad ergamaa Rabbii ta'uu ragaa baha. (*veroo 2*)

Gara salaataa koottaa. (*veroo 2*)

Gara hoffoltii koottaa. (*veroo 2*)

Rabbi waan hundarra guddaadha. (*veroo 2*)

Rabbiin malee gooftan biraa hin jiru. (*veroo 1*)

Salaata fajriitif azaanni yoo godhamu erga yeroo lamaa "*hayya alal falaah*" jedhamee booda jechi kanatti aanu dabalamee jedhama.

Assalaatu kheeyirun minannawmi,

الصلاة خير من النوم،

Assalaatu kheeyirun minannawm.

الصلاة خير من النوم.

### **Hiikkaa:-**

Salaanni hirribarra ni caalti. Salaanni hirribarra ni caalti.

## AZAANA DHAGEEFFACHUU

1) Mu'uminoonni yoo azaana dhagahan cal'isanii dhageeffachuufi kutaa azaanaa tokko tokkoon akkuma mu'azzinni geesseen harkaa fuudhanii deebisanii jechuu qabu.

2) Yeroo mu'azzinni "*hayya alas-salaah*" fi "*hayya alal falaah*" jedhu garuu mu'uminoonni dhageeffattoonni:-

Laa hawula walaa quwwata illaa billaah

لا حول ولا قوة إلا بالله

jedhanii deebisuu qabu.

### **Hiikkaa:-**

"(Rabbiin (yoo ta'e) malee malliifi humni hin jiru." jechuudha.

3) Yeroo azaanni geeffame dhageeffattoonnis ta'ee mu'azzinni nabi Muhammad (SAW) irratti rahmata buusu (salaat alan nabii qara'uu) qabu.

## "SALAAT ALAN-NABII" AZAANA BOODA GODHAMU

Allaahumma salli alaa Muhammadin wa alaa aali Muhammadin kamaa salleeeyita alaa Ibraahiima wa alaa aali Ibraahima Innaka hamiidun majiid. Allahumma baarik alaa Muhammadin wa alaa aali Muhammadin kamaa baarakta alaa Ibraahiima wa alaa aali Ibraahiima innaka hamiidun majiid.

اللهم صل على محمد وعلى آل محمد كما صليت على إبراهيم وعلى آل إبراهيم إنك حميد مجيد. اللهم بارك على محمد وعلى آل محمد كما باركت على إبراهيم وعلى آل إبراهيم إنك حميد مجيد.

### Hiikkaa:-

"Yaa Rabbi! akkuma nabi Ibraahimiifi (AS) warra Ibraahim (AS) irratti rahmata buufte nabi Muhammadiifi (SAW) warra nabi Muhammad (SAW) irrattis rahmata buusi, waan Ati Faarfamaa, Mootii taateef. Yaa Rabbi! akkuma nabi Ibraahimiifi (AS) warra Ibraahiim (AS) irratti barakaa goote, nabi Muhammadiifi (SAW) warra nabi Muhammad (SAW) irratti barakaa godhi, waan Ati Farfamaa, Mootii taateef."

## DU'AA'II AZAANA BOODA GODHAMU

Allaahumma Rabba haazihid-da'iwatit-taammaa was-salaatil qaa'imah Aati Muhammadanil Wasiilata walfadiilata wab'asihu maqaaman mahmuudan allazii wa'adtah.

اللهم رب هذه الدعوة التامة والصلاة القائمة آت محمدا الوسيلة والفضيلة وابعثه مقاما محمودا الذي وعدته.

### **Hiikkaa:-**

"Yaa Rabbi! gooftaa waamichatti guutuu tanaati fi salaata dhaabbattu tanaa! barakaa waamichattii tanaan (si kadhannee) nabi Muhammadiif (SAW) mirga araarsuu (guyyaa kaafamaa), (jannata keessattis) kabajaafi sadarkaa guddaa kenniif. Iddoo faarfamaa waadaa galteef irrattis ol kaasi." (Bukhaarin gabaasan)

Jaabir (RA) ergamaan Rabbii (SAW) akkana jechuu isaanii odeessaniiru:- «Namni tokko yoo azaana dhagahu:- "Yaa Rabbii gooftaa waamichattii guutuu tanaafi salaata dhaabbattu tanaa! barakaa waamichattii tanaatin nabi Muhammadiif (SAW) mirga araarsuu guyyaa kaafamaa, jannata keessattis kabajaafi sadarkaa guddaa kenniif. Iddoo faarfamaa waadaa galteef irrattis ol kaasi" kan jedhu yoo ta'e jaarsummaa kiyya argatuun isaa kan mirkanaa'e.» jedhaniiru. (Bukhaarin gabaasan)

## IQAAMAA

"Iqaamaan" waamicha salaataa kan lamuu isa yeroo salaanni fardii yookan dirqamaa jama'aan (woliin) yookan kophaa sagadamuuf ta'u namoota salaataatti kaasuuf godhamu.

## AKKAATAA DUBBIFAMAAFI QABIYYEE IQAAMAA

Allaahu Akbar, Allaahu akbar.  
Ashahadu an laa ilaaha illallaah.  
Ashahadu anna Muhammadan rasuulullaah. Hayya alas-salaah, Hayya alal falaah. Qad qaamatis-salaah, Qad qaamatis-salaah. Allaahu akbar, Allaahu akbar. Laa ilaaha illallaah.

الله أكبر الله أكبر، أشهد أن لا إله إلا الله، أشهد أن محمدا رسول الله،  
حي على الصلاة، حي على الفلاح،  
قد قامت الصلاة قد قامت الصلاة،  
الله أكبر الله أكبر، لا إله إلا الله.

### **Hiikkaa:-**

Rabbi waan hundaa caalaa guddaa dha. Rabbi waan hundaa caalaa guddaa dha.  
Rabbiin malee gooftaan biraa jiraachuu dhabuu ragaa baha.

Muhammad ergamaa Rabbii ta'uusaaniis ragaa baha.  
Gara salaataa koottaa, gara hoffoltii koottaa.  
Salaanni jalqabamuufii (qophaa'aa).  
Rabbi waan hundaa caalaa guddaadha, Rabbi waan hundaa  
caalaa guddaadhaa.  
Rabbiin malee gooftaan biraa hin jiru.

Akkaataan dubbifamaafi qabiyyeen iqaamaa kun waa'ee  
azaanaa yeroo jalqabaatif abjuun yookan manaaman Abdullaah  
ibni Zeeyid ibni Abdi Rabbih (RA) arguu isaanii hadiisa odeessan  
keessatti kan ibsame wajjiin bifa tokkicha.

# **KUTAA AFRAFFAA**

## **SIRNA (AKKAATAA) SAGADAA**

### **"SUTRAA" (DALLAA QIBLAA)**

Namni tokko salaata odoo hin jalqabin dura fuundura bakka sujuuda isaa wanta tokko kaa'uu qaba. Wanti akkanaa kan godhamu bakka namichi sagadutti akka namoonni odoo hin argin isa hin qaxxaamurre akka gargaatu yoo ta'u kan fayyadus nama kophaa sagaduufi. Wanti kun "sutraa" jedhama. Namni nama sagadu fuundura qaxxaamuruu fedhe jidduu namicha sagaduutifi sutraatin qaxxaamuruu hin qabu.

Nama jama'aan sagaduuf imaamni akka sutraatti waan fayyaduuf sutraa biraa gochuun hin barbaachisu. Haa ta'u malee, imaamtichi mataa isaatiif fuundura isaatti sutraa godhachuu qaba. Imaamaf sutraa kan barbaachisu ala dirree irratti yoo sagade uf dalla'uuf kan itti fayyadamu malee masjiida keessatti barbaachisni isaa baay'ee miti.

### **QIBLAA (JIHAA SALAATAA)**

Namni muslimaa kan addunyaa tana keessatti biyya kamillee jiraatu yeroo sagadu fuula isaa gara ka'ibaa garagalchuu qaba. Ka'ibaan biyya Su'udii Arabiyaa keessa (Makkatti) kan argamu masjiida ulfina qabaata adha. Yeroo salaanni sagadamu fuula gara qiblaa (gara ka'ibaa) garagalchuun sirnoota sagadaa kan daran barbaachisan keessaa isa tokko. Ta'us yoo namichi iddoo jihaa qiblaa beekuuf hin dandeessifne kan akka barahaa, bosonaa, magaalaa fi ganda guddaa hin beekne keessa ta'ee jihaan isaaf hin galle hanga danda'ameen namoota gaafachuun yoo ta'uu baate

garuu jihaa qiblaa ni ta'a jedhee yaadetti garagalee yoo sagade Rabbiin salaatasaa ni qeebala.

Fakkeennaf doonii, baabura yookan roophilaa, wkf... keessatti odoo sagadaa jirtan jihaa isin jalaa yoo jijjiire rakkina hin fidu.

### **Hubachiisa:-**

Yeroo ammaa koompaasin jihaa qiblaa agarsiisu hojjatameera. Iddoo hin beekamneefi yeroo roophilaan deemtan koompaasii qabachuun faayidaa qaba.

## **NIYYACHUU (NIYYAA)**


Namni sagadu erga fuula isaa gara qiblaa garagalchee booda salaata sagaduuf niyyachuu (onnoon yaaduu) qaba. Niyyaan onnoon waan ta'eef namni sagadu fardii, salaata dabalataa, sunnaa jabaafi kkf... keessaa kam akka sagaduu fedhe onnoon niyyachuu qaba. Yeroo niyyatan sagalee hanga dhagahamutti olfuudhanii niyyaa dhageessisuu hin qabanu.

## **TAKBIIRATAT-TAHHIIM**

Namni sagadu erga niyyatee booda salaaticha jalqabuuf "*Allaahu Akkbar*" jechuu qaba. (kana jechuun 'Rabbi waan hundaa caalaa guddaa dha' jechuudha.) Yeroo kana harkasaa lamaan hanga gateettii ykn hanga gurrasaa qubbeen isaa addaan baasee ol kaasuu qaba. Sana booda harkasaa lamaan deebisee dachaafachuun harka mirgaa bitaa irra kaa'un laphee (qoma) isaa irra (yookan qomasaa jala garaa olitti) qabachuu qaba. "*Allaahu akbar*" iin jalqabaa kun "*takbiiratatahriim*" jedhama. Sababiin isaas erga takbiiratatahriim godhamee (jedhamee) booda salaaticha malee gochi, dubbii sochiin biraa kamillee kan dhoorgame waan ta'eefi. Sagadaan salaatasaa jalqabee hanga



geessutti ijjisaa kan laaluu qabu bakka addisaa boqatu (bakka sujuudaa) qofa ta'a.<sup>7</sup>



Akkaataa uffata dubartii

Takbiirat-tahriim (takbiiraa jalqaba salaataa)

## HARKA DACHAASANII BOQACHIISUU

Erga "*takbiirat-tahriim*" jedhamee booda harki dachaafamee eessa boqatuu qaba? Namoonni tokku tokko harkasaanii

<sup>7</sup> Namoonni tokko tokko yeroo sagadan ijasaanii bakka addisaanii boqatu hin ilaalchisanu. Ijasaanitiin naanna'asaanii hunda waliin gahu. Warri bitaaf mirga gaarrifatanis jiru. Kun sodaa Rabbiitifi walitti qabamuu onnee kan salaata keessatti argamuu qaban waan dadhabsiisuuf hafuu qaba. (hiikaa).

dachaasanii handhuuraa ol, warri biraa ammoo qoma isaanitii gadi boqachiisu. Ta'us nabi Muhammad (SAW) harkasaanii qoma irra boqachiisaa akka turan kan ibsan hadiisotiin jiru. Isaanis:-

Sahaaban Hulbux Xaa'ii jedhaman (RA):- «ani nabiiyiin (SAW) salaata keessatti (ganaa) harkasaanii mirga duuba harkasaanii bitaa irra kaa'udhaan qomasaanii irratti yoo boqachiisan argeera» jedhaniiru. (Ahmadiifi Tirmiziin gabaasan)

Akka Waa'il ibni Hujur (RA). odeessanitti ammoo:- «Nabi Muhammad (SAW) wajjiin yoo sagadu isaanis harkasaanii mirgaa kan bitaa irratti dachaasun (lamaanuu) qomasaanii irra boqachiisaniiru» jedhaniiru.

(Ibni Khuzeeymaa, Abu Daa'wudiifi Muslim gabaasan)



Yeroo dhaabbatanii "faatihaa" fi "suuraa biraa" qara'an akkaataa ijjannaa

Beektonni (fihii) tokko tokko harkasaanii handhuuraa oliifi qomaa gadi boqachiisaa akka turan gabaasonni ibsan kan biraas nijiru. Salaata keessatti harka bakka lamaan kana keessaa tokko irra boqachiisun sirrii dha. Ta'us hadiisota sirrii (sahiiha) olitti

ibsamaniin kan addeeffame muuxannoo nabi Muhammad (SAW) bu'uureffachuun harka qoma irra boqachiifachuun filatamaadha.

## DU'AA'II SEENSAA

Nabi Muhammad (SAW) faatihaa dura kan qara'aa turan du'aa'ii hedduutu jira. Isaan keessaa lama ni ibsina.

Allaahumma baa'id beeyinii wabeeyina khaxaayaaya kamaa baa'adta beeyinal mashriqi wal maghribi. Allaahumma naqqinii min khaxaayaaya kamaa yunaqqaa sawbul abiyadu minad-danasi. Allaahummaa ighsilnii min khaxaayaaya bil maa'i was-salji wal baradi.

اللَّهُمَّ بَاعِدْ بَيْنِي وَبَيْنَ خَطَايَايَ كَمَا  
بَاعَدْتَ بَيْنَ الْمَشْرِقِ وَالْمَغْرِبِ. اللَّهُمَّ  
تَقْنِي مِنْ خَطَايَايَ كَمَا تُقْنِي التَّوْبُ  
الْأَيْضُ مِنْ الدَّنَسِ اللَّهُمَّ اغْسِلْنِي مِنْ  
خَطَايَايَ بِالْمَاءِ وَالسَّلْجِ وَالْبَرْدِ.  
(بخاری، مسلم)

### Hiikkaa:-

"Yaa Rabbi! akka Bahaafi Dhiha addaan fageessitetti anaafi balleessaa (maaseta) kiyyas addaan fageessi. Yaa Rabbi! akkuma waccuun adiin yoo miicamu xurii irraa qulqullaa'u anas maaseta kiyya irraa na qulqulleessi. Yaa Rabbi! maaseta irraa bishaanin, fixeensafi hancabbiin na dhiqi." (Bukhaari fi Muslim galmeessan)

Sagadaan tokko du'aa'ii olitti ibsame qara'uu yoo dadhabe kan kanatti aanu qara'uu ni danda'a.

Subhaanaka Allaahumma wa bihamdika watabaaraka ismuka wata'aalaa jadduka walaa ilaaha gheeyiruka.

سُبْحَانَكَ اللَّهُمَّ وَبِحَمْدِكَ وَتَبَارَكَ  
اسْمُكَ وَتَعَالَى جَدُّكَ وَلَا إِلَهَ غَيْرُكَ.

### Hiikkaa:-

"Yaa Rabbi! qulqullinaafi faarun hundi keeti. Maqaan keetis ulfaate, mootummaan keetis ol ta'e, si malee gooftaan haqaa kan biraa hin jiru, siin ala kan biraa gabbaruunis faayidaa hinqabu."

Sagadaan tokko (faatihaa dura) du'aa'iwwān olitti ibsaman lamaanuu yeroo tokko, yookan lamaan keessaa tokko qofa yookan du'aa'iwwan biraa kan nabi Muhammad (SAW) qara'an gidduu du'aa'ii tokko qara'uu ni danda'a.

Duaa'iwwan kun "*du'aa'ul istiftaah*" yookan du'aa'ii seensa (jalqaba) salaataa jedhamu. Du'aa'ul istiftaah kan qara'amu seensa salaataa kan "raka'aa" duraa keessatti qofa ta'uu qaba.

## **TA'AWWUZA (MAGANFANNA)**

Du'aa'ul istiftaahitti aansee sagadaan akkana jechuu qaba.

A'uuzu billaahi minasheeyixaanir-rajiim. أعوذ بالله من الشيطان الرجيم.

### **Hiikkaa:-**

"Sheeyixaana abaarame jalaa Rabbitti maganfadha."

Kun raka'aa jalqabaa keessatti qofa qara'amuu qaba.

## **TASMIYAAH (MAQAA RABBIITIN JALQABUU)**

Kanatti aansee sagadaan waan asii gadiit qara'a.

Bismillaahir-Rahmaanir-Rahiim. بسم الله الرحمن الرحيم.

### **Hiikkaa:-**

"Maqaa Rabbii ni'ima gurgurdaafi xixinnaalleen nama qananiisutiin (jalqaba)"

Kun ammoo raka'aa hunda keessatti suuraa faatihaa (baniinsaa) dura qara'amuu qaba.

## **SUURATUL FAATIHA (SUURAA BANIISAA)**

Itti aansee sagadaan suuratul faatihaa qara'uu qaba.  
Kunis akka kanatti aanu:-

Alhamdu lillaahi Rabbil  
 Aalamiin Ar-Rahmaanir-  
 Rahiim, Maaliki yowmid-diin,  
 Iyyaaka na'abudu wa'iyyaaka  
 nasta'iin, Ihidinas-siraaxal  
 mustaqiim, Siraaxal-laziina  
 an'amta aleeyihim gheeyiril  
 maghiduubi aleeyihim walad-  
 du'aalliin. Aamiin.

الْحَمْدُ لِلَّهِ رَبِّ الْعَالَمِينَ. الرَّحْمَنِ الرَّحِيمِ .  
 مَا لَكَ يَوْمَ الدِّينِ . أَيَّاكَ تَعْبُدُ وَأَيَّاكَ تَسْتَعِينُ . اهْدِنَا  
 الصِّرَاطَ الْمُسْتَقِيمَ . طِرَاطَ الَّذِينَ أَنْعَمْتَ  
 عَلَيْهِمْ غَيْرِ الْمَغْضُوبِ عَلَيْهِمْ وَلَا الضَّالِّينَ .  
 آمين .

### Hiikkaa:-

"Faaruun kan Rabbiiti. Gooftaa aalama hundaa kan ta'e. Isa ni'imaa gugurdaafi xixinnaan nama qananiisu. Mootii guyyaa murtii. Siqofa gabbarra, Siqofatti gargaarsifannas. Daandii qajeelaa nu garsiisi. Daandii warra itti hin dallaniniifi warra hin jallatini irratti qananiiste". "Aamiin" (nurraa qeebali.)

Faatihaa qara'uun dirqama. Waan nabi Muhammad (SAW) salaanni faatihaa odoo hin qara'amin sagadame hundi fudhatama kan hin qabne ta'uu isaa dubbataniif.

Ubaadaa ibni Saamit (RA), ergamaan Rabbii (SAW) akkana jechuu isaanii galmeessaniiru:- «Salaanni odoo faatihaan hin qara'amin sagadame fudhatama hin qabu.» (Hayyonni hadiisaa jahan gabaasan)

Hadiisa Abuu Hureeyiraan (RA) gabaasan keessatti ergamaan Rabbii (SAW):- «Namni salaata yoo sagadu "ummul-qur'aan" (haadhoo qur'aanaa) yookan maqaa biraatin "faatihatal kitaab" (bantuu kitaabaa) hin qara'in salaanni isaa hirdhuu ta'a, hurdhuu ta'a, hirdhuu ta'a (al sadi), kanaaf salaanni isaa guutuu miti.» jechuun akka dubbatan ibsameera.

(Bukhaariin, Muslimiifi Ahmad gabaasaniiru)

Akka Abuu Hureeyiraan (RA) odeessanitti ergamaan Rabbii (SAW) akkana jedhaniiru:- «sagadaan suuratul faatihaa yoo hin qara'in salaannisaa gatii hin qabaatu.»

(Ibni Khuzeeeyimaan, Ibni Hibbaanifi Ahmad gabaasaniiru)

Hadiisota olitti tuqaman irraa kan hubannu tokko tokkoo raka'aa salaata hundaa keessatti suuratul faatihaa qara'uun dirqama ta'uu isaati.

## IMAAMA DUUBAN SUURATUL FAATIHAA QARA'UU

Namoonni tokko tokko yeroo jama'aan sagadan suuratul faatihaa qara'uu qabaachuu yookan qabaachuu dhabuu irratti baay'ee isaan rakkisa. Ta'ullee hadiisni kanatti aanu waa'ee kana sirritti kan ibsu waan ta'eef dhimma kanarratti rakkatuu hin qabani.

Ubaadaa ibni Saamit (RA) akkana jedhu:- «Nabiyyicha (SAW) booda hiriirree salaata fajrii (subhii) sagadaa turre. Isaanis qur'aana irraa aayata cinaa qara'an. Garuu qaraatin isaan dhibee ture. Erga salaata geessanii booda "Sila isin imaama keessan duuban yoo sagaddan ni qaraatuu?" jedhanii nu gaafatan. Nutis "eeyyen, yaa ergamaa Rabbii" jenneen. Sana booda ergamaan Rabbii (SAW) akkana jedhan:- "Yoo imaama duuban sagaddan faatihatul kitaab malee waan biraa hin qara'inaa. Waan nama salaata isaa keessatti isa (faatihaa) hin qara'in salaanni isaa gatii hin qabneef."»

(Abuu Daawudiifi Tirmiiziin gabaasan)

Akka Abuu Hureeyiraan (RA) odeessanittis, Ergamaan Rabbii (SAW) Akkana jedhaniiru:- «Namni tokko ummul kitaabin odoo hin qara'in yoo sagade salaanni isaa hirdhuudha, salaanni isaa hirdhuudha, salaanni isaa hirdhuudha; Kanaaf salaata guutuu miti.»

Abuu Hureeyiraan (RA) gama isaanitiin «imaama boodan yoo sagadnu hoo maal gochuu qabna?» jedhamanii (namoota biraatin) gaafatamnaa «sagalee oddoo hin dhageessisne qara'aa...» jechuun deebii kennaniiru. (Muslim gabaasaniiru)

## AAMIIN JECHUU

Namni tokko suuratul faatihaa qara'ee yoo geesse "aamiin" jechuun "sunnaa" dha. Namichi kophaa isaa sagadu faatihaa qara'ee yoo geesse sagaleesaa odoo hin dhageessisne «aamiin» jechuu qaba. Jama'aan kan sagadu yoo ta'e ammoo imaamtichi faatihaa qara'ee jecha dhuma akkuma afaanii baafateen sagalee ol-fuudhameen "aamiin" yoo jedhame sagaleen jama'aa hundaa bakka tokkotti sirritti dhagahamuu qaba. Yoo imaamni faatihaa geesse hanga "aamiin" jedhamutti yeroo hafuura baafannaa gahuuf cal'isanii turuun barbaachisaa dha. (Jecha hiikaa)

Nu'eeyim Almujaamir yoo dubbatan:- «Abuu Hureeyiraa (RA) duuban yoo sagadu "Bismillaahir-Rahmaanir-Rahiim" erga jedhanii booda suuratul faatihaa qara'aniiru. Ergasii suuratul faatihaa "waladdu'aalliin" jedhanii xumurraan "aamiin" jedhaniiru. Namoonni duuban sagadanis wajjumaan "aamiin" jedhan.» (Bukhaariin gabaasan)

Sahaabiin Axaa'i jedhaman:- «Sahaabonni 200 nabiiyii (SAW) wajjiin masjiida keessatti odoo sagadan arge. Ergasii imaamni "waladdu'aalliin" jennaan isaanis "aamiin" yoo jedhaniifi sagaleen isaanis bakka tokkotti yoo qillisu dhagaheera» jedhaniiru.

## SUURAA FAATIHA A DUUBAN QARA'AMU

Sagadaan tokko raka'aawwan duraa lamaan salaata fardii keessatti erga fatihaa qara'ee geessee booda suuraa yookan aayata qur'aanaa kan biraa yoo qara'e filatamaadha, waan sunnaa ta'eef. Sagadaan rukuu'a tokko keessatti suuraa tokko yookan

sanaa ol qara'uu ni danda'a. Namni haara'a salaata jalqabu suurawwan gaggabaabdota kanatti aanan gidduu kan laafef qara'uu ni danda'a.

## A. Suuratul Ikhilaas (Suura Qulqullinaa)

*"Bismillaahir-Rahmaanir-Rahiim."*

"Qul huwallaahu ahad, Allaahus-samad, lam yalid, walam yuulad, walam yakun lahuu kufuwan ahad."

بِسْمِ اللَّهِ الرَّحْمَنِ الرَّحِيمِ  
قُلْ هُوَ اللَّهُ أَحَدٌ. اللَّهُ الصَّمَدُ. لَمْ يَلِدْ.  
وَلَمْ يُولَدْ. وَلَمْ يَكُنْ لَهُ كُفُوًا أَحَدٌ.

### Hiikkaa:-

"Maqaa Rabbii ni'ima Gugurdaafi xixinnaan nama qananiisutiin (jalqaba)."

"Inni Rabbii tokkicha, Rabbi irkoo hundaati. Hin dhalle, hin dhalannes. Inni hiriyyaa (fakkaataa) tokkos hin qabu, jedhi."

## B. Suuratul Falaq (Suuraa Bariisaa)

*"Bismillaahir-Rahmaanir-Rahiim"*

"Qul A'uuzu birabbil falaqi, min sharri maa khalaqa, wamin sharri ghaasiqin izaa waqab, wamin sharrin-naffaasaati fil uqadi, wamin-sharri haasidin izaa hasad."

بِسْمِ اللَّهِ الرَّحْمَنِ الرَّحِيمِ  
قُلْ أَعُوذُ بِرَبِّ الْفَلَقِ. مِنْ شَرِّ مَا خَلَقَ. وَمِنْ  
شَرِّ غَاسِقٍ إِذَا وَقَبَ. وَمِنْ شَرِّ النَّفَّاثَاتِ  
فِي الْعُقَدِ. وَمِنْ شَرِّ حَاسِدٍ إِذَا حَسَدَ.

### Hiikkaa:-

"Maqaa Rabbii ni'imaa gugurdaafi Xixinnaan nama qananiisutiin (jalqaba)."

"(Rabbii) Gootaa Bariisaa (ta'e)tti maganfadhaa, Hamtuu (Inni) uume hunda irraa, Hamtuu halkanii irraayis yeroo dukkanaaye, Hamtuu dubartoota (mortuu) jibrii guduunfamterratti tuftuu irrallee, Hamtuu hinaaftuu irrallee yeroo natti hinaafan (ni maganfadha) jedhi."



## C. Suuratun-Naas (Suuraa Namootaa)

*"Bismillaahir-Rahmaanir-Rahiim"*

"Qul a'uuzu birabbin-naasi,  
Malikin-naasi. Ilaahin-naasi, Min-  
sharril waswaasil khannaasi,  
Allazii yuwawisu fiisuduurin-naasi,  
minal jinnati wannaas."

بِسْمِ اللَّهِ الرَّحْمَنِ الرَّحِيمِ  
قُلْ أَعُوذُ بِرَبِّ النَّاسِ، مَلِكِ النَّاسِ، إِلَهِ النَّاسِ،  
مِنَ شَرِّ الْوَسْوَاسِ الْخَنَّاسِ، الَّذِي يُوَسْوِسُ فِي  
صُدُورِ النَّاسِ، مِنَ الْغِيَةِ وَالنَّاسِ.

### Hiikkaa

"maqaa Rabbii ni'ima Gugurdaafi Xixinnaan nama qananiisutiin (jalqaba)."

"Gooftaa namootatti maganfadha, Mootii namoota hundaa kan ta'etti, Gabbaramaa (Ilaahii) namoota hundaa kan ta'etti, hamtuu (sheeyixaana) hasaasaa kan mul'atee dhabamu irraa. Isa onnee namootaa keessatti hasaasu (wasawwasu) kan jinnootafi namoota irraa ta'e irraa maganfadha, jedhi."

## RUKUU'A (GADI JECHUU)


Sirna salaata isaa itti fufuun sagadaan harka lamaan isaa ceekuu isatti qixxeessun ganaa harkasaa gara fuundurasa laalchisee hanga gurra isaatti ol kaasun «*Allaahu Akbar*» haa jedhu. Ergasii gadi haa jedhu. Yeroo kana qubbeen isaa addaan baasee ganaa isaa jilbasaa irra kaa'uu qaba. Haala kanaan rukuu'af gadi jedhee ija isaatin bakkee sujuudaa laalaa afaanin xinaatee hima kanatti aanu al sadi jechuu qaba. Innis:-

Subhaana Rabbiyal Aziim

سبحان ربي العظيم

### Hiikkaa:-

"Goftaan kiyya kan hundaa caalaa Guddaa ta'e qulqullaa'e"



Sagadaan rukuu'a keessatti 'kanuma olitti ibsame kana deddeebisee qara'uu danda'a.

## DU'AA'IWWAN RUKUU'AA

Aayyoo Aa'ishaan (RA) ergamaan Rabbii (SAW) yeroo heddu rukuu'a fi sujuuda yoo godhan du'aa'ii kanatti aanu akka qara'an dubbataniiru:-

Subhaanaka Allaahumma Rabbanaa  
wabihamdika Allaahumma ighfirlii.

سُبْحَانَكَ اللَّهُمَّ رَبَّنَا وَبِحَمْدِكَ اللَّهُمَّ  
اغْفِرْ لِي. (بخاری، مسلم)

### Hiikkaa

"Yaa Gooftaa keenya! qulqullinniifi faarunis siif haa ta'u, yaa Rabbii naaf dhiisi."  
(Bukhaarifi Muslim gabaasan)

Aliin (RA) ergamaan Rabbii (SAW) du'aa'ii kanatti aanu rukuu'a keessatti qara'aa akka turan ibsaniiru.

Allaahumma laka raka'atu wabika  
aamantu, walaka aslamtu Anta  
Rabbii, Khasha'a sam'ii, wa  
basarii, wa azamii, wa asabii, wa  
mastaqallat bihii qadamayya  
Lillaahi Rabbil aalamiina.

اللَّهُمَّ لَكَ رَكَعْتُ وَبِكَ آمَنْتُ وَلَكَ  
أَسْلَمْتُ أَلْتَ رَبِّي خَشَعَتِ سَمْعِي وَبَصَرِي  
وَعَظْمِي وَعَصَبِي وَمَا اسْتَقَلَّتْ بِهِ قَدَمِي لِلَّهِ  
رَبِّ الْعَالَمِينَ. (أحمد)

### Hiikkaa

"Yaa Rabbi! siif gadi jedha (rukuu'a godha). Sitti amanees jira. Siif tole jechuun harka kiyyas sitti kennadheera. Ati Gooftaa kiyya. Gurrikoo, ijjikoo, (sammuun) lafeen koo, ribuun koo fi waliigalatti qaamni luyiti kiyya baadhate hundi sima sodaan Siihii, Rabbii Gooftaa aalamaatiif, ajajamaafi bitamaadha."

(Ahmad, Muslim, Abu Daawudiifi warri biroos gabaasan)

Rukuu'afi sujuuda sirritti raawwachuu ilaalchisee hadiisonni kanatti aanan galmeeffamaniiru.

Abii Sa'id Al-khudriin (RA) akka odeessanitti ergamaan Rabbii (SAW) akkana jedhu:- «Yeroo rukuu'afi sujuuda godhu odoo duugda isaa hin dhommooqsin qajeelchee gadi jechuun nama hin sararsin Rabbi salaata isaa homaattuu hin lakkaa'u.»

(Ibni Hibbaanifi Xabaraaniin gabaasaniiru)

Akka Abii Qataadaan (RA) odeessanitti ergamaan Rabbii (SAW) akkana jedhaniiru:- «Hattuun akkaan badaa isa salaata ufii hatu.» Ergasii sahaabonni «Namni tokko akkamitti salaata ufii hatuu danda'a?» jechuun nabiiyicha gaafatan. Isaanis (SAW) «rukuu'afi sujuuda yoo godhu duugdasaa odoo hin qajeelchine yoo hafu» jechuun deebisaniiru.

(Ahmad, Xabaraanii, Ibni Khuzeeyimaafi Haakim gabaasan)

Hadiisonni kun kan mirkaneessan rukuu'afi sujuudni dirqamatti tasgabbiidhaan, suutafi sirritti raawwatamuu akka qabaniifi kun yoo hin ta'in garuu salaatiichi hirdhuu akka ta'uu dha.

## AKKAATAA IJJANNOO RUKUU'A BOODAA

Raawwii rukuu'a sirrii ta'ee booda sagadaan tokko kan kanatti aanu qara'aa rukuu'a irraa ol jechuu qaba.

**Sami'allaahu liman hamidah.** سمع الله لمن حمده. ربنا لك الحمد  
**Rabbanaa lakal hamdu**

### Hiikkaa

"Rabbi dhugatti nama isa faarfatu ni dhagaha. Yaa Gooftaa keenya! faarun (hundi) siif haa ta'u."

Akkana jechaa yoo ol jedhu harkasaa hanga gurraatti ol kaasuu qaba. Ergasii dafee harka gadi lakkisuun qaama walitti dacha'ee ture deebisee qajeelchuun sirritti ol jedhee dhaabbachuu qaba.<sup>8</sup>

## DU'AA'IWWAN YOO RUKUU'ARRAA KA'AN GODHAMAN

Akka Abii Sa'iid Al-Khudriin (RA) odeessanitti ergamaan Rabbii (SAW) "*Sami'allaahu liman hamidah*" erga jedhanii booda kan kanatti aanu qara'aa turan (garuu dirqamaa miti).

---

<sup>8</sup> Namoonni tokko tokko sagadaan rukuu'a yoo bu'uufi rukuu'a irraa yoo ol deebi'us yoo harka ol fuudhu itti aaru. Ta'us nabi Muhammad (SAW) yeroo salaata jalqaban, rukuu'a duraafi boodas, akkasumas yeroo raka'aa sadaffaatif ol ka'an harkasaanii kaasaa akka turan Bukhaariin, Muslimiifi warri birallee galmeessaniiru. Gara 400 kan shallagaman sahaabonni nabi Muhammad (SAW) muuxannoma nabi Muhammad (SAW) kana ibsaniiru. Waan ta'eef harka kaasun sunnaa ta'uu isaatif shakkiin hin jiru. Namni kana hojjatus nama hin hojjanne caalaa mindaa argata. Ta'us garuu gochichi hadiisota keessatti kan galmaa'e ta'us salaanni nama harka ol hinfuunees fudhatamaa ta'uusaa beektonni sagalee tokkoon itti waliigalaniiru.


Allaahumma Rabbanaa lakal hamdu mil'as-samaawaati wamil'al ardi wamil'a maa shi'ita min sheeyi'in ba'adu. Ahlas-sanaa'i walmajdi ahaqqu maaqaalal abdu, wakullunaa laka abdu. Allaahumma laa maani'a limaa a'ixeeeyita walaa mu'ixiya limaa mana'ata walaa yanfa'u zal jaddi minkal jaddu.

اللهم ربنا لك الحمد ملاً السموات  
وملاً الأرض وملاً ما شئت من شيء  
بعد أهل الثناء والمجد أحق ما قال  
العبد وكلنا لك عبد، اللهم لا مانع  
لما أعطيت ولا معطي لما منعت ولا  
ينفع ذا الجمد منك الجمد.

### Hiikkaa

"Yaa Rabbi! faaruun (hundi) siif haa ta'u. Faaruun samiiwwaniifi dachiiwwan guutee, ergasis faaruun waan ati feete hunda guute. Abbaan faaruufi mootummaa dhuunfate waan gabrichi jedhus haqa godhata, nuti hunduu gabroota Keeti. Yaa Rabbi! nama ati kenniteefif kan dhoorgatu hinjiru, nama ati dhoorgatte namni kennuuf hin jiru. Kabajaan gosummaafi beekamummaa yoo sibiraa ta'e malee homaa nama hin fayyadu."<sup>9</sup>

(Muslim, Ahmadiifi Abu Daawud gabaasan)




Akkaataa rukuu'aa yoo ol jedhan (i'itidaala) itti dhaabbatan.

<sup>9</sup> Du'aa'ii kana qomatti qabachuun (haffazuun) dirqamaa miti.

## SUJUUDA (ADDA LAFAAN TUQUU) JALQABAA

Sujuuda jechuun sirna adda dachiin tuquuti. Sagadaan itti fufuun "*Allaahu akbar*" jechuun gara sujuudaa bu'a. Yeroo sujuuda goonu qaamoleen nafa keenyaa torba dirqamatti dachii tuquu qabu:-

- addafi qarree funyaanii,
- ganaa harka lamaanii,
- kurree jilba lamaanii,
- qubbiin luka lamaanii gara keessatiin.



Akkaataan sujuudaa maddiin yoo laalamu

Sagadaan odoo addi isaa dachiirra jiru kan kanatti aanu jedhuu qaba: (xinnaatee al sadi)

Subhaana Rabbiyal A'ila

سبحان ربي الأعلى

### Hiikkaa

"Gooftaan kiyya kan hundaa ol ta'e qulqullaaye".

## DU'AA'IWWAN SUJUUDAA

Sagadaan tokko sujuuda irratti du'aa'iwwan inni qara'uu qabu jiru. Isaan kanatti aanan akka fakkeeniyatti ibsina:-

Aliin (RA) ergamaan Rabbii (SAW) sujuuda irratti du'aa'ii kanatti aanu qara'aa akka turan dubbataniiru:-

Allaahumma laka sajadtu wabika  
aamantu walaka aslamtu sajada  
wajhii lillazii khalaqahu wa  
sawwarahu fa'ahsana suwarahu  
wa shaqqa sam'ahu wa basarahu  
fatabaarakallaahu ahsanul  
khaaliqiin.

اللَّهُمَّ لَكَ سَجَدْتُ وَبِكَ آمَنْتُ وَلَكَ  
أَسَلْتُ سَجْدٌ وَجْهِي لِلَّذِي خَلَقَهُ  
وَصَوْرُهُ فَأَحْسَنَ صُورُهُ وَشَقَّ سَمْعَهُ  
وَبَصَّرَهُ فَتَبَارَكَ اللَّهُ أَحْسَنُ الْخَالِقِينَ.

(مسلم)

### Hiikkaa

"Yaa Rabbi! Siif sagade, Sitti amane, siif tole jedhe, fuulli kiyya Rabbii isa uumef, kan qaama kenneefi qaama isaas sirritti tolcheef, kan gurra isaafi ija isaa baneef ni sagada, Rabbiin daran tolchee waa uumu kun dhugaan qulqullaaye" (Muslim gabaasan)

Abuu Hureeyiraan (RA) ergamaan Rabbii (SAW) sujuuda irratti kan kanatti aanu jedhaa akka turan dubbataniiru.

Allaahumma ighfirlii, zambii kullahu  
diqqahu wajillahu, awwalahu wa  
aakhirahu, wa alaaniyatahu wa sirrahu.

اللَّهُمَّ اغْفِرْ لِي ذَنْبِي كُلَّهُ دَقَّةً  
وَجِلَّةً أَوْلَهُ وَآخِرَهُ وَعَلَانِيَتَهُ وَسِرَّهُ

### Hiikkaa



"Yaa Rabbi! Balleessaa kiyya guddaafi xiqqaa, kan kana duraafi kan amma boodas (odoo hin beekne) hojjadhu, kan ifatti yookan dhooasaan hojjadhu hundumaa naaf dhiisi."

Namni sagadu yeroon inni caalmaan Rabbitti dhiyaatu sujuuda irratti. Kanaaf sujuudni tasgabbiifi suutan raawwatamuu qaba.

Waan ta'eef sagadaan hanga danda'ameen ju'aa'iwwan heddu odoo godhee filatamaadha.

## "JALSAA" (TEESSUMA) SUJUUDA LAMAAN GIDDUU

Sagadaan erga sujuuda tokko sirritti tasgabbiin godhee booda "*Allaahu akbar*" jechaa adda isaa iddoo sujuuda itti godhe irraa kaasuu qaba. Ergasii luka isaa irra taa'a. Lukti mirgaafi jilbi isaa garuu bakkuma yeroo sujuudaa jiranitti turu. Keessattuu qubbeen luka mirgaa isaa jihaa qiblaatti gargalanii akkuma lafarratti dhaabbataniifi moorgeenni lukaa akkuma dhaabbatetti qaama isaa baadhatee tura. Sagadaan ganaa harkasaa lafarraa kaasee jilbasaa irra kaa'uu qaba.



Sujuudni duuban yoo ilaalamu

Akkaatan teessuma gidduu sujuuda  
lamaanii fuula duraan yoo laalamu



Sujuudota lamaan gidduu xinnoo taa'anii du'aa'iwwan kanatti aanan qara'uun sunnaadha.

Allaahumma ighfirlii, warhamnii,  
wahdinii, wa'aafinii, warzuqnii,  
wajburnii, warfa'anii.

اللَّهُمَّ اغْفِرْ لِي وَارْحَمْنِي وَاهْدِنِي  
وَعَافِنِي وَارْزُقْنِي وَاجْبِرْ لِي وَارْزُقْنِي

### Hiikkaa

"Yaa Rabbi! naaf dhiisi, naaf rahmati, na qajeelchi, fayyaa naaf kenni, rizqii halaala ta'e naaf kenni, na suphi, sadarkaa kiyyas ol kaasi."



Akkaataa teessuma gidduu Sujuuda lamaanii yoo duuban laalamu

Sagadaan du'aa'ii kana yeroo tokko yookan sanaa ol hanga fedhe deddeebisee jechuu ni danda'a.

## **SUJUUDA LAMMAFFAA**

Ergasii sagadaan akkuma sujuuda duraa raawwateen "*Allaahu akbar*" jechaa sujuuda lammaffaa raawwachuuf ka'uu qaba.

Du'aa'iwwan sujuuda duraa keessatti qara'eefi gocha hojjate hunda sujuuda lammaaffaa keessattis ni raawwata.

## **JALSATUL-ISTIRAAH (TEESSUMA BOQONNAA GABAABDUU)**


Sagadaan erga sujuuda lammaffaa geessee booda "*Allaahu akbar*" jechuun adda (mataa) isaa lafarraa ol kaasun akkuma yeroo gidduu sujuuda lamaanii taa'e yeroo gabaabduuf taa'uu qaba. Kana kan godhu raka'aa lamuutif ka'ee dhaabbachuuf yoo ta'u. Haala kanaan raka'aan sirna salaataa isiin duraa xumuramti.

## **RAKA'AA LAMMAFFAA**

Sagadaan jalsaa istiraah (boqonnaa gabaabduu) booda raka'aa lammaffaatif ka'ee yoo dhaabbatu akkuma raka'aa duraa keessatti godhe harka isaa dadachaasee qoma isaa irra kaa'un faatihaa "*Bismillaahir-Rahmaanir-Rahiim...*" jechuun jalqabee erga qara'ee booda qur'aana keessaa suuraa fedhe hanga danda'e qara'uu qaba. Ergasii akkuma raka'aa duraa raawwate raka'aa lammataas guutee raawwatu qaba.

## **TASHAHHUDA**

Dhuma raka'aa lammaffaatti sujuuda lamuu erga fixee booda sagadaan "*Allaahu akbar*" jechuun mataa isaa erga ol fuudhee booda akkuma sujuuda lamaan gidduu taa'etti harka bitaa jilba bitaa irra, harka mirgaa jilba mirgaa irra kaayuu qaba. Sana booda haala kanaan taa'ee kan kanati aanu qara'uu qaba.



### Akkaataa teessuma tashahhuda lammaffaa

Attaahiyyaatu lillaahi wassalawaatu  
waxxayyibaatu, assalaamu aleyyika  
ayyuhan-nabiyyu warahmatullaahi  
wabarakaatuhu, assalaamu aleyyinaa  
wa' alaa ibaadillaahis-saalihiina,  
ashihadu an laa ilaaha illallaahu wa  
ashihadu anna Muhammadan  
abduhuu warasuuluhu.

التَّحِيَّاتُ لِلَّهِ وَالصَّلَوَاتُ وَالطَّيِّبَاتُ  
السَّلَامُ عَلَيْكَ أَيُّهَا النَّبِيُّ وَرَحْمَةُ اللَّهِ  
وَبَرَكَاتُهُ السَّلَامُ عَلَيْنَا وَعَلَى عِبَادِ اللَّهِ  
الصَّالِحِينَ. أَشْهَدُ أَنْ لَا إِلَهَ إِلَّا اللَّهُ  
وَأَشْهَدُ أَنَّ مُحَمَّدًا عَبْدُهُ وَرَسُولُهُ.

(متفق عليه)

### Hiikkaa

"Nageenyi afaanii kan Rabbiiti. Ibaadan qaamaas (salaannis),  
ibaadan qabeenyafi mallaqaan godhamu (sadaqaan)-hunduu (kan  
Rabbiiti). Yaa nabiyyicha! nageenyi sirratti haa bu'u, rahmanni  
Rabbiifi barakaan Isaas (sirratti haa bu'u). Nageenyi nuufi gabroota  
Rabbii gaggaarii hundaa irratti haa bu'u. Rabbiin malee gooftan  
haqaa akka hin jirre ragaa baha. Muhammadis gabrichaafi  
ergamaa Isaa ta'uu ragaa baha." (Bukhaariifi Muslim gabaasan)

Sagadaan wayita *"ashihadu..."* jechuu jalqabu quba mul'iftuu harka mirgaasaa ol qabeetin gara fuunduraa agarsiisa. Yeroo *"...abduhuu warasuuluhu"* jedhu ammoo quba isaa gara dura turetti gadi deebisa.

Namni salaata raka'aa lama qofa sagadu (yoo salaattattiin abbaa raka'aa lamaa taate) kanumaan "salaat-alan-nabii" itti fufuu qaba. Kunis qooda lamaffaa "tashahhuda" ta'uu isaati.

## **RAKA'AA SADAFFAATIF KA'UU**

Namni salaata raka'aa sadi yookan afur sagadu akka tashahhuda (qooda jalqabaa) qara'ee geessen ka'ee dhaabbachuun harka isaa ol fuudhee *"Allaahu akbar"* jedhee qoma isaa irra boqachiiuu qaba. Itti aansee qaraatii isaa *"Bismillahi..."* jechuun jalqabee suuraa faatihaa qara'uu qaba. Salaatota fardii keessatti raka'aa sadaffaafi afraffaa *"Bismillaahi..."*n jalqabee suuraa faatihaa qofa qara'uun gahaadha. Suuraa biraa qara'uu hin qabu.

Sagadaan raka'aa xumuraa guuttatee yoo geesse akkuma hanga ammaa ibsameen tashahhudaaf taa'uu qaba. Ergasii tashahhuda qara'uu qaba.

## **SALAATA ALAN-NABII (NABIYYII IRRATTI RAHMANNI AKKA BU'U DU'AA'II GODHUU)**

Sagadaan akkuma tashahhuda dhumaa geesseen ittii aansee gara tashahhuda qooda lammaffaa (salaat alan-nabii) darbuu qaba. Innis akka kanatti aanutti qara'ama:-

Allaahumma salli alaa Muhammadin, اللهم صل على محمد وعلى آل محمد كما صليت على إبراهيم

aali Ibraahima, Innaka Hamiidun  
Majiid. Allaahumma baarik alaa  
Muhammadin, wa alaa aali  
Muhammadin, kamaa baarakta alaa  
Ibraahiima, wa alaa aali Ibraahiima,  
Innaka Hamiidun Majiid.

وعلى آل إبراهيم إنك حميد مجيد.  
اللهم بارك على محمد وعلى آل  
محمد كما باركت على إبراهيم  
وعلى آل إبراهيم إنك حميد مجيد.

### Hiikkaa

"Yaa Rabbi! Muhammadiifi warra (aalii) isaanii irratti rahmata buusi, akkuma Ibraahimiifi warra (aalii) isaanii irratti rahmata buufte, waan Ati Faarfamaafi Mootii taatef. Yaa Rabbi! Muhammadiifi warra (aalii) isaanii irratti barakaa taasisi, akkuma Ibraahimiifi warra (aalii) isaanii irratti barakaa taasifte, waan Ati Faarfamaafi Mootii taatef."

## DU'AA'IWWAN SALAAT ALAN-NABII BOODA GODHAMAN

Nabi Muhammad (SAW) Salaat alan nabii booda kan qara'aa turaniifi sahaabota isaanitiifis kan barsiisan du'aa'iwwan heddu jiru. Nutis du'aa'iwwan kanneen gidduu gariisaanii asii gaditti ibsina.

Akka Abdullaah ibni Amri (RA) dubbatanitti Abuu Bakri (RA) ergamaa Rabbiitin (SAW) akkana jedhaniin:- «Mee du'aa'ii salaata kiyya keessatti qara'u naaf himaa.» Sana booda Ergamaan Rabbii (SAW) akkana jedhan:-

Allaahumma innii zalamtu nafsii  
zulman kasiiran, walaa yaghfiruz-  
zunuuba illaa anta faghfir lii  
maghfiratan min indika,  
warhamnii innaka antal  
Ghafuurur-Rahiim.

اللهم إنى ظلمت نفسى ظلما كثيرا ولا  
يغفر الذنوب إلا أنت فاغفر لى مغفرة  
من عندك وارحمنى إنك أنت الغفور  
الرحيم. (بخارى، مسلم)

## Hiikkaa

"Yaa Rabbi! ani (dirqama Ati narratti gatte bahuu dadhabuun) nafsee tiyya miidhaa guddaa miidheera. Kan balleessaa namaaf dhiisu simalee hin jiru. Araara sibiraa taate naaf araarami, rahmatas naaf godhi, waan Ati Araaramaa Rahmata godhaa taateef."  
(Bukhaarifi Muslim gabaasan)

Shaddaad ibni Awus (RA) akka gabaasanitti nabiyiin Rabbii (SAW) salaata isaanii keessatti akkana jedhaa turan:-

Allaahumma innii as'alukas-sabaata fil amri, wal aziimta alar-rushdi, wa as'aluka shukra ni'imatika, wahusna ibaadatika, wa as'aluka qalban saliiman, walisaanan saadiqan, wa as'aluka min kheeyri maa ta'alamu wa'auuzu bika min sharri maa ta'almu, wa'astaghfiruka limaa ta'alamu.

اللَّهُمَّ إِنِّي أَسْأَلُكَ الْبَاتَ فِي الْأَمْرِ  
وَالْعَزِيمَةَ عَلَى الرُّشْدِ وَأَسْأَلُكَ شُكْرَ  
نِعْمَتِكَ وَحَسْنَ عِبَادَتِكَ وَأَسْأَلُكَ قَلْبًا  
سَلِيمًا وَلِسَانًا صَادِقًا وَأَسْأَلُكَ مِنْ خَيْرِ  
مَا تَعَلَّمَ وَأَعُوذُ بِكَ شَرِّ مَا تَعَلَّمَ  
وَأَسْتَغْفِرُكَ لِمَا تَعَلَّمَ. (نسائي)

## Hiikkaa

"Yaa Allaah! kheeyirii hunda irratti turmaata, (dhimma hunda keessatti cimina), karaa qajeelaa irratti jabeenya si kadha. Ni'imaa kee irratti sigalateeffachuufi ibaadaa kee gaggaarii irrattis dandeettii akka naaf kennitu si kadha. Onnee gaarii yaadufi arraba dhugaa dubbatu akka naaf kennitus si kadha. Kheeyrii Ati beektu hunda si kadha. Sharrii (hamtuu) Ati beektu hundarraa sitti maganfadha. Balleessaa kiyya kan beektu hundaaf araara si kadha."  
(Nasaa'iin gabaasan)

Aayyoo Aa'ishaanis (RA) ergamaan Rabbii (SAW) salaatota isaanii keessatti du'aa'iwwan kanatti aanan akka qara'an odeessaniiru:-

Allaahumma innii a'uuzu bika min azaabil qabri, wa a'uuzu bika min fitnatid-dajjaal wa a'uuzu bika min fitnatil mahyaa walmamaati. Allaahumma innii a'uuzu bika minal ma'isami wal maghrami.

اللَّهُمَّ إِنِّي أَعُوذُ بِكَ مِنْ عَذَابِ الْقَبْرِ وَأَعُوذُ بِكَ مِنْ فِتْنَةِ الدَّجَالِ وَأَعُوذُ بِكَ مِنْ فِتْنَةِ الْحَيَاةِ وَالْمَمَاتِ. اللَّهُمَّ إِنِّي أَعُوذُ بِكَ مِنَ الْمَأْتَمِ وَالْمَغْرَمِ. (بخاری، مسلم)

### Hiikkaa

"Yaa Allaah! adaba (azaaba) qabrii irraa sitti maganfadha. Fitnaa dajjaal jalaas sitti maganfadha. Fitnaa jireenya fi du'aa jalaayis sitti maganfadha. Yaa Allaah! maasetta bifa hundaatifi cinqaa tasa ga'u hunda jalaa sitti maganfadha".

Rabbi ij'alnii muqiimas-salaati, wamin zurriyyatii. Rabbanaa wa taqabbal du'aa'i Rabbanaa ighfirlii waliwaalidayya, walilmu'uminiina yawma yaquumul hisaab.

رب اجعلني مقيم الصلاة ومن ذريتي ربنا وتقبل دعاء ربنا اغفر لى ولوالدي وللمؤمنين يوم يقوم الحساب.

### Hiikkaa

"Gooftaa Kiyya! nama salaata tolchee sagadu na taasisi, warraafi maatii kiyya irrallee nama salaata dhaabu taasisi. Gooftaa keenya! du'aa'iwwan (salaatota) keenyas qeebali. Gooftaa keenya! guyyaa madaalli (mizaanni) dhaabbatu anaaf, haadhaa abbaa kiyyaaf, mu'uminoota hundaafis araara kee buusi."

Namoonni heddu "salaat alan-nabii" booda du'aa'iwwan kanaa olii kan qara'an ta'us du'aa'iwwan biraas qara'uun ni danda'ama. Garuu du'aa'in qara'amu kan nabiiyiin (SAW) "salaat alan nabii" booda qara'an keessaa yoo ta'e filatamaadha.

## SALAATA XUMURUU

Dhumarratti sagadaan du'aa'ii hanga fedhe erga godhee booda dura fuulasaa gara mirgaa ergasii gara bitaa gara galchuun akka kanatti aanu jechuun salaata isaa xumura.

Assalaamu aleeykum warahmatullaah

السَّلَامُ عَلَيْكُمْ وَرَحْمَةُ اللَّهِ

### Hiikkaa

"Nageenyifi rahmanni Rabbii isinirratti haa jiraatu."



Yoo salaata geessee gara mirgaa salaamata baafatu

## DU'AA'IWWAN SALAATA BOODA GODHAMAN

Nabi Muhammad (SAW) erga salaata geessanii booda qara'aa kan turan du'aa'iwwan heddu jiru. Kanaaf namni salaata sagadu du'aa'iwwan kanneen qomatti qabatee yeroo sagadu qara'uudhaan karaa (muuxannoo) nabi Muhammad (SAW) hordofuu qaba Du'aa'iwwan kanneen keessaa muraasni kanatti aananii ibsamu.



Allaahu akbar, Astaghfirullaah,  
Astaghfirullaah, Astaghfirullaah.  
Allaahumma Antas-salaamu wa  
minkas-salaamu tabaarakta yaa  
zaljalaali wal ikraam.

اللَّهُ أَكْبَرُ، أَسْتَغْفِرُ اللَّهَ - ٣ -  
اللَّهُمَّ أَنْتَ السَّلَامُ وَمِنْكَ السَّلَامُ  
تَبَارَكْتَ يَا ذَا الْجَلَالِ وَالْإِكْرَامِ. (مسلم)

### Hiikkaa

"Rabbiin waan hundarra Guddaadha.

Rabbiin araarama gaafadha." (al sadi)

"Yaa Allaah! Ati nagaadha, nageennis simarraayi. Ati qulqulluudha,  
yaa abbaa ol aantummaafi kabajaa..." (Muslim gabaasan)

Allaahummaa a'innii alaa zikrika  
washukrika wahuusni ibaadatika.

اللهم أعني على ذكرك وشكرك  
وحسن عبادتك. (أحمد، وأبو داود)

### Hiikkaa

"Yaa Allaah! yeroo hunda si faarsuu, si galateeffachuu fi ibadaa  
kee gaggaarii irratti na gargaari."

Laa ilaaha illallaahu wahdahuu,  
laa shariika lahuu, lahul mulku wa  
lahul hamdu wahuwa alaa kulli  
sheey'in qadiir. Allaahumma laa  
maani'a limaa a'axeeyta walaa  
mu'uxiya limaa mana'ata walaa  
yanfa'u zal jaddi minkal jaddu.

لا إله إلا الله وحده لا شريك له، له  
الملك وله الحمد وهو على كل شيء  
قدير. اللهم لا مانع لما أعطيت ولا  
معطي لما منعت ولا ينفع ذا الجد منك  
الجد. (بخارى)

### Hiikkaa

"Rabbiin malee gooftaan biraa kan haqaa hin jiru. Inni tokkichaafi  
kan hiriyyaa hin qabne. Mootummaan kan isaati, Faarunis kan  
isaati. Inni waa hunda irratti danda'aadha. Yaa Allaah! waan ati  
kennite kan dhoorgatu hin jiru, waan Ati dhoorgatte ammoo kan  
kennu hin jiru. Si biratti firri gaariniifi kabajaan ofiis ta'ee kan nama  
biraa kan fayyadu hin jiru." (Bukhaarifi Muslim gabaasan)

## "ZIKRII"

### (RABBIIN FAARSUU)

Salaata booda kan kanatti aanu jechuun sunnaa dha.

Subhaanallaah, (al 33)

سُبْحَانَ اللَّهِ ، (٣٣)

Alhamdulillaah, (al 33)

الحمد لله ، (٣٣)

Allaahu. akbar, (al 33)

الله أكبر، (٣٣)

### Hiikkaa

"Qulqullinni Rabbiif haa ta'u",

"Faaruun kan Rabbiiti"

"Rabbiin waan hundarra Guddaadha."

## SALAATUL-MARIID

### (SALAATA DHIBAMAA)

Namni dhibeen yookan rakkoon walfakkaatu irra ga'e yoo salaata dirqamaa (fardii) dhaabbatee sagaduu hin danda'in taa'ee akka sagadu hayyamameefiira. Taa'ee sagaduu namni hin dandeenne ammoo cinaacha irratti irkatee sagaduu ni danda'a. Yoo kanas dadhiabe duuydarratti ciisee malkataan akeekaa salaatuu akka qabu hadiisonni ni mul'isu. Kana hundaa yoo dadhabes salaata isaa ni tursiisa malee haala kamileen sababaan salaanni hin sagadamneef hin jiru.

# **KUTAA SHANAFFAA**

## **SALAAOTOTA YEROO ADDA ADDAA**

Kutaa kana jalatti kan laallu salaatotota yeroo adda addaa sagadamaniifi baay'ee barbaachisaafi cimaa ta'an keessaa salaatotota garii ta'a. Jalqabarratti yeroowwan adda addaa yoo jennu yeroo heddu kan mul'isu ta'ullee kutaa kana keessatti kan ilaallu garuu salaatotota witrrii, jum'aa, iidii, janaazaa, taraawihaafi qasrii qofa ta'a.

### **SALAAATA WITRII**

Salaanni witrrii sunnaa jabaa (sunatul mu'akkadaa) dha. Nabi Muhammad (SAW) ilaalcha guddaa kennaniifiiru. Isaan lukasaanitiinis ta'ee gaalan imala yoo bahanillee salaata kana hin dhiifne. Duuyida gaalaa irrattis sagadaniiru.

Salaata ilaalchi cimaan kennameef waan ta'eef, ulamoonni muraasa ta'an witrriin salaata waajibaa (dirqamaa) akka ta'e murteessaniiru. Ta'ullee erga qorannaan hadiisotaa ofeeggannoon godhamee booda salaatichi waajiba odoo hin ta'in salaata sunnaa kan ilaalchi cimaan kennameef akka ta'e murtaa'eera.

Arabiffaan "*witri*" jechuun "tokko" yookan "baaltokkee" jechuudha. Ergamaan Rabbii (SAW) hadiisa isaanii keessatti «Rabbi tokkicha, kanaaf tokko ni jaalata» jedhaniiru.

Rabbi lakkoofsota hihirdhuu (hafa malee lamaaf hin qoodamne) akkanuma ni jaalata. Sababni kanaas lakkoofsoppi hihirdhuun lamaaf yoo qoodaman hafaan yeroo hunda tokko waan ta'eefi. Sababa kanaaf nabiiyyiin (SAW) lakkoofsota hihirdhuu filatu. Waan jiruu isaanii keessatti yeroo hunda hojjatan lakkoofsa hirdhuun hojjachaa turani. Fakkeenyaaf wayita sagadan, yeroo du'aa'ii godhan yeroo firii teemiraa nyaatan, kkf.

Nabi Muhammad (SAW) mu'uminoonni salaata witrri ishaa'ii booda akka sagadan kan gaafatan waan witrriin salaata galgalaa lakkoofsa hirdhuun akka xumuramu godhuufi.

Akka Abdallaah ibni Umar (RA) dubbatanitti ergamaan Rabbii (SAW) akkana jedhu:- «Salaanni halkanii (salaaatul-leeyli) raka'aa lama lamaan sagadama. Yoo sagadaan natti bari'aaf shakke garuu salaanni inni halkan sagade hundi lakkoofsa hirdhuun akka xumuramu kan godhu raka'aa dhumaa tokko qofa sagaduu qaba.»  
(Bukhaariifi Muslim gabaasan)

## **BAAY'INNA RAKA'AA SALAATA WITRII**

Akka Abdallaah ibni Umar (RA) odeessanitti ergamaan Rabbii (SAW) akkana jedhaniiru:- «Salaanni witrri naflii sunnaa salaata ishaa'ii boodan kan sagadamu salaata raka'aa tokkooti.»

Akka Abuu Ayyuub (RA) odeessanitti ergamaan Rabbii (SAW) akkana jedhu. «Muslimni kamillee salaata witrri sagaduu qaba. Witrri raka'aa shan sagaduu namni fedhe sagaduu ni danda'a. Raka'aa sadi sagaduu namni fedhe ammoo (raka'aa sadi) sagaduu ni danda'a. Raka'aa tokko qofa sagaduu namni fedhes tokkoma sagaduu ni danda'a.»  
(Abuu Daawud, Nasaa'ifi Ibni Majaah gabaasan)

Hadiisota gararratti ibsaman irraa wanti hubannu namni tokko salaata witrri raka'aa 1,3,5,7 yookan 9 sagaduu kan danda'u ta'ullee salaanni witrri bu'uuratti (xinnaatee) raka'aa tokko ta'uu isaati. Lakkoofsa raka'aa witrri kanniin hundaa nabi Muhammad (SAW) sagaduun isaanii hadiisota sahiha ta'aniin mirkanaa'eera.

## **YEROO WITRIIN ITTI SAGADAMU**

Salaanni witrri salaata ishaa'ii erga sagadanii boodarraa jalqabee hanga fajriin barii baqaqutti sagadamuu ni danda'a.

Aayyoo Aa'ishaan (RA) akkana jedhu. «Nabi Muhammad (SAW) yeroowwan halkanii, yeroo tokko tokko halkan qixxee irratti, yeroo tokko tokko ammoo gara duma halkanii irratti sagadu. Garuu salaata kan xumuran odoo fajriin hin mul'anne dura ture.»  
(Bukhaarifi Muslim gabaasan)

Namni halkan ka'ee sagaduu danda'u salaata witrii salaata "tahajjudaa" (halkanii) booda yoo sagade filatamaadha. Garuu namni halkan qixxee yookan sana booda odoo fajriin hin baqaqin hirribarraa ka'ee sagaduu hin dandeenye akkuma ishaa'ii sagadeen odoo gara birribaa hin deemne dura sagaduu ni danda'a.

Akka Jaabir (RA) odeessanitti nabiiyichi (SAW) akkana jedhaniiru: «Eenyullee halkan qixxee booda ka'ee sagaduu yoo hin dandeenye jalqaba halkanii witrii sagaduu qaba. namni halkan qixxee booda ka'uu danda'u garuu yeroo sana ka'ee yoo sagade filatamaadha. Kunis waan salaata dhuma halkanii keessa sagadamu Malaa'ikonni irratti argamaniifi.»

(Muslim, Ahmad, Tirmiiiziifi Ibn Maajaah gabaasan)

## AKKAATAA SAGADA WITRII

Witrii namni raka'aa tokko qofa sagaduu fedhe akkuma salaata biraa sagaduu danda'a. Garuu yoo raka'aa 3, 5, 7, yookan 9 sagaduu fedhe salaatiichi bifa (akkaataa) tokkoo oliin sagadamuu ni danda'a. Fakkeenyaaf:-

)Namni witrii raka'aa sadi sagadu raka'aawwan lamaan jalqabaa akkuma salaata biroo sagaduu ni danda'a. Ergasii "*Assalaamu Aleeyikum warahmatullaah*" jechuun erga fixee booda raka'aa sadaffaa itti aansee kophaa isii sagaduu ni danda'a. Salaata witrii bifa kanaan sagaduun "witri bilfasli" (witrii addaan baasanii sagaduu) jedhama.

**B)** Namni witrîi raka'aa sadi yookan shan sagadu dhuma raka'aa xumuraa irratti malee gidduu raka'aawwanii tashahhudaaf taa'uu dhiisuu ni danda'a.

**C)** Namni witrîi raka'aa sadi, shan yookan torba sagadu yoo raka'aan xumuraa qofti haftu tashahhudaaf taa'uu ni danda'a. Fak. raka'aa sadi qofa kan sagadu yoo ta'e raka'aawwan lama booda, raka'aa shan kan sagadu yoo ta'e raka'aawwan afur booda, raka'aa torba kan sagadu yoo ta'e raka'aa jaha booda, kkf... tashahhudaaf taa'uu ni danda'a. Tashahhudâ godhæe (taa'ee) erga geessee booda salaata witrîi xumuruuf ka'ee raka'aa hafte tokkitti sagaduu qaba.

Akkaatan sagada witrîi kun sadanuu sirrii (sahiiha) fi beektonni (ulamoonni) hedduus kan ittiin hojjatan ta'uun beekameera. Kanaaf musulmoonni witrîi sagaduuf akkaataa sadiin kana keessaa tokko filataii itti fayyadamuu ni danda'u. Ta'ullee yeroo witrîin raka'aa sadi qofaan sagadamu bifa sadan keessaa kan "a" yookan "b" filatanii fayyadamuun baay'ee bayeessa. Kunis waan nabi Muhammmad (SAW) yoo dubbatan «salaata witrîi keessan salaata maghriibatiin wal hin fakkeessinaa» jedhaniifi.

## **DU'AA'II QUNUUTA SALAATA WITRII**

Salaata witrîi yoo sagadan raka'aa dhuma irratti du'aa'ii qunuutaa qara'uun muuxannoo nabi Muhammad (SAW) kan mirkanaa'edha. Innis rukuu'a dura yookan isa booda qara'amuu danda'a.

**A)** Namni rukuu'a dura du'aa'ii qunuutaa qara'uu fedhe erga suuraa faatihaatifi qur'aanarraa suuraa fedhe hanga dande'e qara'ee booda qunuuta qara'uu qaba. Yeroo du'aa'ii qunuutaa qara'u ganaawwan harkasaa fuuldura qaamasaatin gara samii ol qabachuu yookan harkasaa akkuma dachaafamanitti qomasaa irratti dhiisuu ni danda'a.

B) Namni du'aa'ii qunuutaa rukuu'a booda qara'uu fedhes erga rukuu'arraa ka'ee booda ganaawwan harkasaa fuulduratti gara samii ol qabachuun yookan harkasaa qomasaa irratti qabachuun dhaabbatee qara'uu ni danda'a. Garuu du'aa'ii qunuutaa rukuu'a booda gochuuni fi ganaa harkaas gara samii bananii du'aa'ii gochuun muuxannoo (gochaa) nabi Muhammad (SAW) waan ta'eef bifa kanaan fayyadamuun filatamaadha.

Beektonni (fiqhii) tokko tokko raka'aa witrrii isii dhumaa irratti qunuuta qara'uun dirqama ta'a yoo jedhan warri biraa ammoo salaata subhii (fajrii) dhumarratti qara'uutu dirqama ta'a jechuun mormu. Haa ta'u malee, isinis hadiisota odo qorattanii salaata witrillee ta'ee kan fajrii irratti qunuuta qara'uun dirqama akka hin ta'in argachuu ni dandeettu. Kanaaf namni tokko salaatasaa witrrii keessatti du'aa'ii qunuutaa qara'uu yoo dhiise salaatichi jalaa hin hirdhatu. Akkasumas namni tokko du'aa'ii qunuutaa yoo kan hin beekne ta'e bakka qunuutaa suuraa qura'aanaa tokko yookan aayaatota yookan waan biraa qara'uu qaba kan jedhamu sirrii waan hin ta'iniif isa hin barbaachisu. Du'aa'ii qunuutaa keessattuu yeroo rakkinni wahii dhaqqabu salaata kam irrattillee qara'uun ni danda'ama.

## QARAASAFI QABIYYEE

### DU'AA'II QUNUUTAA

Hasan ibni Alii (RA) akka odeessanitti «Ergamaan Rabbii (SAW) du'aa'iwwan salaata witrrii irratti qara'u nabarsiisaniiru» jedhaniiru. Isaanis kan kanatti aanani:-

<p><b>Allaahumma ihdinii fiiman hadeeyta, wa'aafinii fiiman aafeeyta, wa tawallanii fiiman tawalleeyta, wa baariklii fiimaa a'aaxeeyta waqinii</b></p>	<p>اللَّهُمَّ اهْدِنِي فِيمَنْ هَدَيْتَ وَعَافِنِي فِيمَنْ عَافَيْتَ وَتَوَلَّنِي فِيمَنْ تَوَلَّيْتَ وَبَارِكْ لِي فِيمَا أُعْطِيتَ وَفِي شَرِّ مَا</p>
--	--

sharra maa qadeeyta, fa'innaka  
taqdii wafaa yuqdaa aleeeyka,  
innahuu laa yazillu man waaleeyta,  
wafaa ya'izzu man aadeeyta,  
tabaarakta Rabbanaa wa  
ta'aaleeyta, nastagfiruka wa  
natuubu ileeyka, wasallaallaahu  
alaan-nabiyyi.

قضيت فإنك تقضى ولا يقضى عليك  
إنه لا يذل من واليت ولا يعز من  
عاديت تباركت ربنا وتعاليت  
نستغفرك وتوب إليك وصلى الله  
على النبي. (أبو داود، نسائي، ابن ماجه)

### Hiikkaa

"Yaa Allaah! warra (karaa sirrii) qajeelchite wajjiin anas qajeelchi. Warra fayyaa kenniteef waliin anaafis fayyaa kenni. Warra eegumsa kee jala goote waliin anas (hamtuurra) na eegi. Waan naaf kennite keessatti barakaa naaf taasisi. Hamtuu murtii keetin gahu (hunda) jalaa na baasi. Ati waan hunda murteessadha, sirratti hin murteessamu. Nama Ati jaalattee ol kaaftee (kabajje) kan salphisu hin jiru. Nama Ati xiqqeessite (salphifte) kan isa ol kaasu (jabeessu) hin jiru. Gooftaa keenya qulqullinaafi kabajaan keetuma, Ati ol taatee jirta. Nuti araara kee ni barbaanna, dhiifamas si kadhanna, garuma keetti deebinas. Nagaafi rahmanni Rabbii nabiyyicha irratti haa bu'u."

(Abuu Daawud, Nasaa'iifi Ibni Maajah gabaasan)

## SALAATA JUM'AA (JIMAATAA)

Salaanni jum'aa yeroo hunda jimaata wayta seensa yeroo salaata zuhrii jechuun akkuma aduun walakkaa irraa xinnoo dabdeen salaata sagadamu. Salaatichi kan raawwatamu masjiida walitti qabataa (jaami'i) keessattiifi jam'aan (hedduminaan) yoo ta'e qofaa dha.

Islaama keessatti salaata jum'aa ilaalchi guddaan kennam-eefiira. Salaanni kun nama isa sagaduuf kan argamsiisu faayid-aawwan hawaasummaa, siyaasaafi mooraalii kan mataasaa qaba.



Dubartoota, daa'imman gabroota<sup>10</sup>, namoota garmalee dhibamani fi imaltoota irratti malee salaanni jum'aa muslima kamirrattillee dirqama. Namoonni kunniinis yoo barbaadan sagaduu ni danda'u. Mindaas ni argatu. Garuu jum'aan isaanirratti dirqama miti.

Hadiisni biraa waa'ema kana yoo ibsu ammoo:- «Salaata jum'aa nama walitti aansee (yeroo hedduuf) dhiise Rabbi onnee isaarratti ni mallatteessa (ni gogsa). ».

(Ahmad, Tirmiiiziifi Abu Daawud gabaasan)

## **QULQULLINA DHUUNFAA**

Guyyuuta biraa wajjiin yoo walbilarratti ilaalamu guyyaa jimaataa (jum'aa) muslimoota hedduutu masjiidota gugurdaa keessatti walitti qabama. Kanaaf namoonni walitti qabaman qulqullina dhuunfaasaanii akka eegan ilaalcha guddaatu kennameefi.

Nabi Muhammad (SAW) akkana jedhu:- «Namni guyyaa jum'aa qaama dhiqatee (nafa isaa hunda qulqulleessee) qibaatifi shittooo erga dibatee booda jum'aa sagaduuf dursee gara masjiidaa deeme, odoo namoota biraa hin dhiibiniifi hin jeeqin tasgabiidhaan yoo iddoo isaa qabate, ergasii naflii tahiiyaa «gammachuu» masjiidaa erga sagadee booda khuxbaa (gorsa imaamaa) cal'isee yoo dhageeffate Rabbi jum'aa sanarraa kaasee hanga jum'aa itti aanutti maasetta (balleessaa) jidduu sana inni hojjate isaaf dhiisa.»

(Bukhaarin gabaasan)

## **GANAMAAN GARA SALAATA JUM'AA DEEMUU**

Gaafa Jimaataa dursee gara masjiidaa deemuun mindaa (ajrii) caalaa qaba.

---

<sup>10</sup> "Gabra" kan jedhamu yeroo amma hin jiru. Yeroo salaanni Jum'aa ajajamu garuu gabroonni waan turaniif ajajichi gabroota dirqama salaata jum'aa jalaa bilisa godheera. (hiikaa)

Akka Abuu Hureeyraan (RA) odeessanitti Ergamaan Rabbii (SAW) akkana jedhaniiru: «Gaafa jum'aa Malaa'ikoonni balbala masjiidaa irra dhaabbatanii namoota jum'aa sagaduuf gara masjiidaa galan akka tartiiba seensa isaanitiin galmeessu. Namoonni guyyaa sana jalqaba gara masjiidaa seenan akka nama gaala sadaqaa kenne mindaa (ajrii) guddaa argatu. Namoonni isaan booda gara masjiidaa seenan ammoo mindaa nama sa'a sadaqaa kenneet argatu. Malaa'ikoonnis hanga imaamni khuxbaa (gorsa) gochuuf dhufanii "*minbara*" irra taa'anitti namoota akkuma tartiiba seensa isaanitiin galmeessuu itti fufu. Yoo imaamichii dhufan galmeessuu dhaabaniit galmees isaanii cufanii taa'anii khuxbaa dhaggeeffatu.» (Bukhaarin gabaasan)

## **SALAATA JUM'AA DURA SAGADMU**

Namni jum'aa sagaduuf gara masjiidaa deeme (seene) yeroo aduun qixxee guyyaa irraa gara dhiyaa xinnoo dabde irraa kaasee hanga imaamni khuxbaa jalqabutti salaata naflii hanga fedhe sagaduu ni danda'a. Garuu xinnaatee sunnaa raka'aa lamaa (tahiyya masjiidaa) sagaduun isarraa eegama.

## **KHUXBAA (GORSA) CAL'ISANII DHAGGEEFFACHUU**

Khuxbaan erga jalqabamee booda namoonni sagadaaf walitti qabaman cal'isanii dhaggeeffachuu qabu. Namni tokko yoo odoo imaamni khuxbaa godhu masjiida seene, odoo khuxbaa dhaggeeffachuuf hin teenye dura naflii raka'aa lamaa tahiyyaa masjiidaa sagaduu qaba.

Jaabir (RA) ergamaan Rabbii (SAW) khuxbaa odoo godhan akkana jechuu isaanii gabaasaniiru: «Namni odoo imaamni khuxbaa godhu jum'aaf dhufe kamillee raka'aa lama gaggabaabduu salaatu dirqama qaba.»

Hadiisa biraa keessattis Jabiir (RA) «Yeroo tokko odoo Ergamaan Rabbii (SAW) khuxbaa godhaa jiran namni yokko dhfee. Ergsii Ergamaan Rabbii (SAW) "sagadde moo?" jedhanii gaafatan. Namichis "lakkisaa" jedhee deebiseef. Ergasii nabiyichi (SAW):- "Ka'ii sagadi" jedhaniin».

(Bukhaarii, Muslim, Abuu Daawud fi Tirmiiizin gabaasan)

Namoonni tokko tokko odoo imaamni khuxbaa godhu nama masjiida seenee sunnaa raka'aa lamaa sagadu yoo argan ni aaru. Imaamicha akka tuffachuuttis ni lakkaa'u. Kun garuu yaada gogoggora ta'e. Waan muuxannoo nabi Muhammad (SAW) irraa kan fudhatame odoo imaamni khuxbaa godhu namni masjiida seene raka'aa lama sagaduu akka qabu ibsuuf.

Abii Qataadan (RA) Ergamaan Rabbii (SAW) akka kanatti aanu dubbachuu isaanii ibsaniiru. «Namni kamillee yoo gara masjiidaa seenu raka'aa lama (tahiyyatul masjiid) odoo hin saganne taa'un irra hinjiru.» (Bukhaarifi Muslim gabaasan)

## **SALAATA JUM'AA**

Salaanni jum'aa salaata fardii raka'aa lamaati. Namni tokko turee yoo dhufeefi raka'aa lamuu jama'aa wajjiin yoo sagade raka'aa tokko kan isa hafe erga imaamni geeffatee booda ka'ee guutachuu qaba. Namni tokko garmalee turee yoo salaanni jum'aa guutuu guututti isa jalaa dabre fardii salaata zuhrii raka'aa afur sagaduu qaba. Salaanni jum'aa bakka bu'aa salaata zuhriti.

## **SALAATA JUM'AA**

### **BOODA SAGADAMU**

Hadiisa Bukhaariifi Muslim Abdallah ibni Umar eerudhaan gabaasan keessatti:- «Nabiyyichi (SAW) yeroo baay'ee jum'aa booda mana isaanii galaniti sunna raka'aa lamaa sagadaa turan» jedhaniiru.

Hadiisa Muslim, Abuu Daawudiifi Tirmiiziin Abuu Hureeyraa eerdudhaan gabaasan keessatti ammoo «Namani jum'aa booda sagadu raka'aa afur haa sagadu» jedhaniiru.

Hadiisa Abuu Daawud Ibni Umariin eeranii gabaasan keessattis:- «Nabi Muhammad (SAW) yoo masjiidatti sagadan raka'aa afur, yoo manatti sagadan ammoo raka'aa lama sunnaa sagadaa turan» jedhaniiru.

## **SALAATA IIDAA**

Salaata Iidaa kan jennuun salaatota guyyaa Iidal Faxriifi Iidal Adhaa (Arafaa) sagadaman, kan salaata waajiba guyyaa guyyaan sagadamaniin adda ta'an, salaata ayyaana waggaati.

Salaanni Iidaa masjiidaan ala iddoo baldhaa ta'etti raawwat-amuu qaba. Fak. paarkii (iddoo bashannanaa) yookan bakkee dalla'ametti, dirree irratti, kkf. Yoo gaafa roobaa ta'ee dhoqqeen sagada kan dhoorgu ta'e salaatichi masjiida yookan galma keessatti sagadamuu ni danda'a.

Salaanni Iidaa yeroo aduun baatee sirritti mul'atte sagadamuu qaba. Salaanni Iidaa raka'aa lama qaba. Salaata Iidaa duras ta'e booda kan sagadamu salaanni sunnaa homaatuu hin jiru. Salaata Iidatiif azaanas ta'ee iqqaaman hin godhamu.

Ibni Abbas (RA) akkana jedhaniiru. «Nabi Muhammad (SAW) salaata Iidaa raka'aa lama qofa sagadaa akka turan hin shakkisiisu. Sana duras ta'ee booda homaa hin sagadne.»

(Bukhaariifi Muslim gabaasan)

## **AKKAATAA RAAWWII SALAATA IIDAA**

Salanni Iidaa raka'aa jalqabaatti yeroo torba, raka'aa lammaffaa keessatti ammoo yeroo shan walitti aansanii takbiiraa jechuu malee salaatiichi akkuma salaata raka'aa lamaa kan biraati. Salaata Iidaa irratti imaamtichi suuratul faatihaafi qur'aanarraa suuraa biraa dabalanii kan qara'an sagalee ol fuudhaniiti.

Kabiir ibni Abdullaah (RA) akaakayyuu isaanii irra karaa abbaasaanitiin kan itti himame akka galmeessanitti nabiyyiin (SAW) salaata Iidaa irratti odoo qara'uu hin jalqabne dura raka'aa jalqabaatti yeroo torba, raka'aa lammaffaatti yeroo shan takbiiraa jechuu isaanii ibsaniiru.

(Tirmiiziin, Ibni Maajahiifi Daaramiin gabaasan)

Ja'ifar ibni Muhammad (RA) gama isaanitiin akkana jedhu:- «Nabi Muhammad (SAW) Abuu Bakriifi Umar (RA) salaatasaanii Iidaafi gogiinsaa<sup>11</sup> (Istisqaa) keessatti raka'aa jalqabaatti takbiiraa dabalataa torba, raka'aa lammaffaatti ammoo takbiiraa dabalattaa shan jechuun isaanii hin shakkisiisu. Nabi Muhammad (SAW) salaata Iidaa khuxbaa duraa sagadaniiru. Sagaleessaaniis ol fuudhanii dhageessisaniiru. (Shaafi'ii)

## **SALAATA JANAAZAA (REEFFAA)**

Namni tooko yeroo du'e (boqate) muslimoonni biraa namichaaf salaatul janaazaa sagaduu qabu. Salaatul janaazaan "*Fardul kifaayaa*" dha. Kana jechuun hawaasa muslima naannoo sanaa gidduu qoodni murtaa'e (namni hanga ta'ee) namicha du'e yoo hin dhiqin, yoo hin keefaniniifi salaatul janaazaa yoo hin sagadiniif muslimni naannoo sanii hundi Rabbiin biratti yakkamtootafi

---

<sup>11</sup> Salaata gogiinsaa (salaatul istisqaa'i) salaanni jedhamu roobni dhabamee yoo gogiinsi dhalatu akka roobu Rabbiin kadhachuuf salaata sagadamu.

gaafatamtoota ta'u. Muslimoonni xinnoolleen ta'u namicha du'e yoo haala kanaan geegessan, mindaa kan argatan namoota sirna geegessuu adeemsisan qofa ta'anillee, muslimoonni hunduu garuu gaafatama Rabbii jalaa nagaha bahu.

Nabi Muhammad (SAW) hadiisota isaanitiin muslimoonni sirna awwaalaa irratti akka hirmaatan jabeessanii gorsaniiru. Kanaaf dhiirri muslimaa kamillee dirqama nama du'eef qabu guutuf waan danda'e gochuu qaba.

**A)** Jama'aan (hedduminaan) yoo sagadame mindaa (ajrii) caalu kan qabu waan ta'eef jama'aan sagadamuu qaba.

**B)** Yeroo sagadamu namichi du'e dhiira yoo ta'e imaamni qajeelloo mataafi gateettii reeffatiin dhaabbachuu qaba. Dubartii yoo taate garuu qajeelloo duuyda reeffatiin dhaabbachuu qaba.

**C)** Salaanni janaazaa salaatah tiraa irraa adda. Salaanni kun rukuu'a, sujuuda fi tashahuda hin qabu. Kan sagadamu dhaabbatatti qofa ta'a. Yeroo murtaa'efis hin qabu. Haallin biraa kan akka xahaaraa (wuduu'aa), gara qiblaa garagalani sagaduu, sutraa, akkaataa uffataa, kkf. akkuma salaata biraati.

## **AKKAATAA RAAWWII**

### **SALAATA JANAAZAA**

Fuula gara qiblaa deebisuun barbaachisaa dha. Imaamni (yeroo salaataf ka'anii dhaabbatan) tarree (hiriira) isaanii akka sirreeffatan hordoftoota gaafachuu qabu.

Akkuma salaatotaa birootif barbaachisu salaata janaazaa irrattis "*niyyaa*" gochuun (niyyatuun) barbaachisaa dha. Niyyaan wayta godhamu sagalee ol fuudhaniis ta'ee gadi qabatanii afaanin dubbachuun muuxannoo (adaa) nabi Muhammad (SAW) fi sahaabota isaanii (RA) irraa baramee miti.

## TAKBIRAA JALQABAA

Salaanni janaazaa takbiiraa afur qaba. Takbiiraan duraa *takbiiratat-tahriim* jedhama. Yeroo imaamni "*Allaahu Akbar*" jedhan jama'aanis akkasuma haa jedhu. Imaamni harkasaanii mirgaa ciqilee harkasaanii bitaa irra gochuun harkasaanii lamaaanuu qomasaanii irra kaa'uu (jama'aanis akkasuma gochuu) qabu.

## Du'aa'ii Seensaa

Ergasii sagadaan suuratul-faatihaa qara'uu dura du'aa'iwwan seensaa raka'aa jalqabaa kan salaata kamillee keessatti akka qara'aman filataman (qiraatiwwan faatihaa duraa) gidduu tokko qara'uu ni danda'a.

Subhaanaka Allaahumma wabihamdika, watabaarka ismuka. wata'aalaa jadduka, walaa ilaaha gheeyruka. سُبْحَانَكَ اللَّهُمَّ وَبِحَمْدِكَ وَتَبَارَكَ اسْمُكَ وَتَعَالَى جَدُّكَ وَلَا إِلَهَ غَيْرُكَ.

## Hiikkaa

"Yaa Allaah! qulqulliniifi faaruun keeti. Maqaan keetis qulqullayeera. Mootummaan keetis ol ta'eera.. Simalee gooftaan biraa hin jiru."

Beektonni tokko tokko seensa salaata janaazaa irratti du'aa'ii gochuu hin deeggarani. Du'aa'ii qara'uun garuu filatamaadha. Sagadaan itti aansee kan kanati aanu qara'uu qaba.

A'uuzu billaahi minash-sheeyxaanir-rajiim. Bismillaahir-Rahmaanir-Rahiim. أَعُوذُ بِاللَّهِ مِنَ الشَّيْطَانِ الرَّجِيمِ. بِسْمِ اللَّهِ الرَّحْمَنِ الرَّحِيمِ.

Xalhaa ibni Abdullaah ibni Awfi (RA) akka odeessanitti odoo Abdullah ibni Abbaas (RA) duuba ta'anii salaatul-janaazaa sagadan Abdullaah ibni Abbaas (jechuun imaamichi) sagaleesaanii

ol fuudhanii suuratul faatihaa qara'aniiru. Salaaticha booda «Sagalee kiyya ol fuudhee kan qara'e salaata janaazaa keessatti suuratul-faatihaa qara'uun sunnaa nabi Muhammad (SAW) waan ta'eef isinis qara'uu kiyya beektanii yookan dhageettanii akka qaraataniiifi» jedhaniiru. (Bukhaariin gabaasan)

Suuratul-faatihaa booda suuraa qur'aanaa tokko yookan suuraa tokko irra gooda wahii qara'uun barbaachisaa miti.

### TAKBIIRAA LAMMAFFAA

Itti fufuun imaamtichi takbiiraa lamaffaa dhageessisuu qabu. Jama'aanis akkasuma. Takbiiraa lamaffaa booda sagadaan onnee isaatin "Salaat alan-nabii" qara'uu qaba. Sagadaan "salaat alan-nabii" tashahhuda salaata biroo keessatti qara'u yoo qara'e filatamaa dha.

### TAKBIIRAA SADAFFAA

Itti fufuun imaamichi takbiiraa sadaffaa jechuu qaba. Hordofoonnis imaama boodan takbiiraa jechuu qabu. Namni kamillee yeroo kana namicha du'eef du'aa'ii gochuu qaba. Du'aa'in namicha du'e ni fayyada jedhamee yaadamu kamillee godhamuu ni danda'a. Du'aa'iwwan kana keessaa gariin kanaa gaditti ibsamaniiru.

## DU'AA'IWWAN JANAAZAAF (NAMA DU'EEF) GODHAMAN

- 1) Abuu Hureeyraan (RA) akka odeessanitti Ergamaan Rabbii (SAW) nama muslimaa kan du'e tokkoof salaatul-janaazaa sagadanii yoo du'aa'ii godhaniif himoota kanatti aanan qara'aniiru.



Allaahumma ighfir lihayyinaa, wa mayyitinaa, wa shaahidinaa, wa ghaa'ibinaa, wa saghiirinaa, wa kabiirinaa, wa zakarinaa, wa uunsaanaa. Allaahumma man ahyeeytahuu minnaa fa'ahyihi alal islaam, waman tawaffeeytahuu minnaa fatawaffihi alal iimaan. Allaahumma laa tahrinnaa ajrahuu, walaa taftinnaa ba'adahuu.

اللهم اغفر لحينا وميتنا وشاهدنا وغائبنا وصغيرنا وكبيرنا وذكرنا وأئتنا. اللهم من أحببته منا فأحبه على الإسلام ومن توفيته منا فوفه على الإيمان اللهم لا تحرمنا أجره ولا تفتنا بعده.

(مسلم)

### Hiikkaa

"Yaa Allaah! jiraa keenyaf, du'aa keenyaf, kan as jiruuf, kan as:hin jirreef, xiqqaa keenyaf guddaa keenyaf, dhiira keenyaf dhalaa keenyaf hundaafuu araarami. Yaa Allaah! nama nurraa jiraachifte islaamummaa irratti jiraachisi, nama nurraa boqachiifte (ajjeefte) ammoo iimaana irratti boqachiisi. Yaa Allaah! mindaa namicha du'ee nun dhoorgatin<sup>12</sup>, isa boodas (cinqaan) nu hin fattanin (yaalin)."

(Muslim gabaasan)

2) Awfi ibni Maalik (RA) yoo gabaasan:- «Ergamaan Rabbii (SAW) salaata janaazaa tokko yoo sagadan du'aa'ii kanatti aanu kan qara'an dhagaheera, anis du'aa'icha qomatti qabadheera» jechuun dubbataniiru.

Allaahumma ighfir lahuu, warhamhu, wa'afu anhu, wa'aafihi, wakrim nuzulahu, wa wassi'i mudkhalahu, waghsilhu bilmaa'i, was-salji, wal bardi. Wanaqqih

اللهم اغفر له وارحمه واعف عنه وعافه واكرم نزله ووسع مدخله واغسله بالماء والثلج والبرد ونقه مسن

<sup>12</sup> Gatii tajaajila (faayidaa) nuti isaaf goonee jechuudha.

minal khaxaayaa kamaa yunaqqaas-sawbul abiyadu minad-danasi, wa'abdilhu daaran kheeyran min daarihii, wa'ahlan kheeyran min ahlihii, wa zawjan kheeyran min zawjihii, wa'adkhillul jannata, waqihi fitnatal qabri, wa'azaaban-naar.

الْحَطَايَا كَمَا يَنْقَى التُّوبُ الْأَيْضُ مِنْ  
الدَّنَسِ وَأَبْدَلُهُ دَارًا خَيْرًا مِنْ دَارِهِ  
وَأَهْلًا خَيْرًا مِنْ أَهْلِهِ وَزَوْجًا خَيْرًا مِنْ  
زَوْجِهِ وَأَدْخِلَهُ الْجَنَّةَ وَلَهُ فِتْنَةُ الْقَبْرِ  
وَعَذَابِ النَّارِ. (مسليم)

### Hiikkaa

"Yaa Allaah! araaramiif, rahmata godhiif, dhiifamas godhiif, fayyaa kenniif, keessummmaasaa kabajaa godhiif, seensa (mana haara'a isaas) baldhisiif, bishaanin, baradaafi fixeensanis isa dhiqi. Maaseta (balleessaa) irraa akkuma waccuun adiin xurii irraa qulqullooftutti isa qulqulleessi. Bakka jireenyaa kan gandasaa (kan duniyaa) irra caalu bakka buusif, warra warrasaa (kan duniyaa) irra caalan bakka buusif, niitii niitiisaa (tan duniyaa) irra caaltu bakka buusif. Jannata isa seensisi, fitnaa qabarii jalaa isa baasi, fitnaa ibidda azaabaa jalaayis (isa baasi)." (Muslim gabaasan)

3) Abu Hureeyraan (RA) akka odeessanitti ergamaan Rabbii (SAW) wayta salaata janaazaa sagadan akkana jedhaniiru.

Allaahumma anta Rabbuhaa, wa'anta khalaqtahaa, wa'anta razaqtahaa, wa'anta hadeeytahaa lil Islaam, wa'anta qabadta ruuhahaa, wa'anta a'alamu bisirrihaa wa'alaaniyyatihaa, jii'inaa shufa'aa'a faghfir lahuu zanbahu.

اللَّهُمَّ أَنْتَ رَبُّهَا وَأَنْتَ خَلَقْتَهَا وَأَنْتَ  
رَزَقْتَهَا وَأَنْتَ هَدَيْتَهَا لِلْإِسْلَامِ وَأَنْتَ  
قَبَضْتَ رُوحَهَا وَأَنْتَ أَعْلَمُ بِسِرِّهَا  
وَعَلَائِقِهَا جِنًّا شَفَعَاءَ لَا غَيْرَ لَهُ ذَنْبُهُ.  
(أبو داود، أحمد)

## Hiikkaa

"Yaa Rabbi! Gooftan (reeffa) tanaa sima, simatu isii uume, simatu sooratas isiif kenne, gara Islaamaas simatu qajeelche, simatu ruuhii isiis dhandhooonate (fudhate), waan isiin dhoksiteefi ifatti hojjatt'es kan beeku sima, nuti kan dhufne araara isiif sikadhachuuf qofa waan ta'eef balleessaa isii hunda dhiisif (araaramiif)."

(Abuu Daawudiifi Ahmad gabaasan)

## TAKBIIRAA ARFAFFAA

Itti fufuun imaamichi takbiiraa araffaa ni dhageessisa. Sana booda salaama baafata. Hordofoonnis takbiiraa dhumaa kana jechaa dura gara mirgaa, ergasii gara bitaa morma isaanii naannessaa "*Assalaamu aleykum warahmatullaah*" jedhu. Haala kanaan salaatichi xumurama.

## **SALAATA IMALARRATTII**

Islaamni daandii jireenyaa kan yeroo hunda hojiirra oolu waan ta'eef haala hordofootasaa irratti rakkina uumu hunda ilaalcha keessa amanti galchuufi kan haalas mijeessu akka ta'e beekamaadha. Kanaaf imala irratti salaata fardii gaggabaabsuniifi walitti fidanii akka sagadaman hayyama kennuun fakkeenya guddaa dha.

A) Qasriin (Salaata gabaabsanii) sagaduu:- Muslimni tokko yeroo imalarra jiru salaata Zuhrii, Asrii fi Isha'a'ii gabaabsee raka'aa lama qofa sagaduu ni danda'a. Salaata subhiifi maghriibaa garuu gabaabsuun hin hayyamamu.

Imalarratti Qasriin (salaata gabaabsanii) sagaduun ajrii caalaa ta'e qaba. Ergamaan Rabbii (SAW) waa'ee kana yoo dubbatan:- «Inni kennaa Rabbi isiniif kenne waan ta'eef fudhachuun isinirra jira» jedhaniiru.

(Muslim gabaasan)

**B) Salaata Walitti Fiduu (Jam'ii gochuu):-** Namni imalarra jiru salaatotaa zuhriifi asrii walitti qabee wayta zuhrii yookan wayta asrii sagaduu ni danda'a. Akkasuma salaatotaa maghriibafi ishaa'ii walitti fiduun wayta maghriibaa yookan wayta ishaa'ii bakka tokkotti sagaduu ni danda'a.

Ibni Abbaas (RA) akka odeessanitti Ergamaan Rabbii (SAW) imalarratti ta'anii zuhriifi asrii walitti qabani sagadaa turaniiru. Akkasumas maghriibafi ishaa'ii walitti qabani sagadaniiru.

(Bukhaariin gabaasan)

Mu'aaz (RA) akka odeessanitti ergamaan Rabbii (SAW) duula Tabuukif karaa seenanii turan. Karaarratti bakka tokko qubatanii erga turanii booda ka'anii deemuf yoo barbaadan aduun qixxee irraa yoo xinnoo dabdu salaatotaa zuhriifi asrii walitti qabani yeroo zuhriitti sagadaniiru. Odoo aduun gara dhiyaa hin dabne dura socho'uuf (deemuf) yoo murteessan ammoo zuhrii tursiisaniit salaata asrii wajjiin sagadu. Akkasumas yoo imalaaf socho'uu barbaadanii aduun seenne maghriibafi ishaa'ii bakka tokkotti walitti qabaniit yeroo maghriibaa sagadan. Yoo deemsa karaa isaanii itti fufuu barbaadan salaata maghriibaa tursiisaniit salaata ishaa'ii wajjiin yeroo ishaa'ii walitti qabani sagadan.

(Abuu Daawudiifi Tirmiziin gabaasan)

## **YEROO SALAATA GABAABSUFI WALITTI QABUUN DANDA'AMU**

**A) Akka Yahyaa Ibnii Yaziid odeessaniitti:-** «Salaata qasriin Sagaduun yoom akka hayyamamu Ibni Maalikiin (RA) gaafadhee, isaanis Ergamaan Rabbii (SAW) karaa gara maayila sadihii ta'u yoo deeman qasriin sagadaa akka turan naaf deebisaniiru.» jechuun ibsaniiru.

(Muslim, Ahmad, Abuu Daawudiifi Beeyhaqiin gabaasan)

**B) Abuu Sa'iid (RA) «Ergamaan Rabbii (SAW) yeroo fageenya farsakha tokko<sup>13</sup> ga'u deeman qasriin sagadaa turan» jedhaniiru. (Talkhiis ibni Hajar)**

Hadiisota kanneen irratti hundaahudhaan namni tokko yoo manaa ka'u karaan inni deemu guyyaa sadi kan fixu yoo ta'e gabaabsee sagaduufi salaatotas walitti qabee sagaduu ni danda'a. Fageenyi kun gabaabsanii sagaduu kan dandeessisu fageenya isa xinnaa dha. Fageenya kanaa gadiitif qasriin sagaduun hin hayyamamu.

## **DHEERACHUU YEROO IMALAA**

Namni tokko imallisaa torbeewwan, ji'oota yookan waggoota yoo jalaa fudhate erga imalarra jiraatee salaatotasaa gabaabsees ta'ee walitti qabee sagaduu ni danda'a. Kaayyoo imalasaa bakkaan ga'uuf iddoo tokkos qubatee yoo ture salaatota gabaabsufi walitti qabee sagaduu ni danda'a. Ta'ullee yoo iddoo tokko beekatuma yeroo murtaa'ef turuu fedhe garuu salaata yeroo hagamiif walitti fidee akkasumas gababsee sagaduu akka danda'u beektonni yaada adda addaa qabu. Fak. guyyoota 4f, 10f, 17f, 18f, kkf. warri jedhan jiru.

## **NAFLII (SALAATA DABALATAA) IMALARRATTI SAGADUU**

Nabiyyiin Rabbii (SAW) imalarrattillee salaata witiitifi sunnaa qabliyyaa subhii hin dhiifne. Kanaaf mu'iminoonni imalarrattis salaatota sunnaa kanneen sagad'uu qabu. Garuu salaatota naflii fi sunnaa kan biroo kamillee imalarratti sagaduun ni danda'ama moo? Hadiisonni kanatti aanan gaafii kana ni deebisu.

---

<sup>13</sup> Farsakhni tokko gara km. 83tti shallagama.

Hafsi ibni Asiim yoo dubbatan:- «Abdullaah ibni Umar (RA) wajjiin gara makkaa deemee ture. Gara makka yoo deemu isaan salaata zuhrii yoo nusagachiisan raka'aa lama qofa nusagachiisan. Ergasii dukkaana isaanii keessa taa'uf deeman. Namoonni tokko tokko yoo sagadan arganiit maal hojjachaa akka turan na gaafatan. "Naflii sagadaa turan" jedheen. Ergasii akkana naan jedhan "naflii sagaduu odoo danda'ee dura fardicha guutadhee sagadutu narra ture". Itti fufaniis "Ani imala tokko irratti Ergama Rabbii wajjiin deemee ture. Isaanis imalarratti raka'aa lamaa ol hin sagadne. Sana boodas Abu Bakri, Umariifi Usmaan wajjiin karaa deemeera, isaanis akkuma nabi Muhammad (SAW) godhan hojjatan. Fakkeenyummaa gaarif muuxannoon nabi Muhammad (SAW) isiniif jira" naan jedhan.» (Bukhaariin gabaasan)

Sahaabonni muraasni yeroo imala deeman naflii sagadaa akka turan kan mirkaneessan hadiisonni muraasa ta'an kan biraas jiru. Garuu imalarratti naflii dhiisutu filatama.

## SUJUUDA DAGUU

Nabiyyii kabajamaa kan ta'an Muhammadillee (SAW) yeroo salaata sagadan dagachuufi dogoggora xixinnaa hojjachuu ni danda'u. «Anis namuma, akkuma isin dagattan anis dagadha. Kanaaf yoo ani dagadhu na yaadachiisaa» jechuun isaanii gabaafameera.

"*Sajdataal-sahwi*" (sujuuda daguu) kan jedhamu sagadaan raka'aa lammaffaatti "*tashahhuda*" (attahiyyaatun) qara'eef hin qaraanee yoo shakkeefi yoo walii wallaale odoo salaamata hinbaafatin dura yookan sana booda kan bu'u 'Sujuudota' lama. Hadiisota biraa keessatti akka gabaafametti nabiyyiin akkana jedhaniiru. "Yoo tokkoon keessan salaata keessatti dagateefi hagam akka sagade-raka'aa sadi yookan afur sagaduusaa yoo shakke gara irra

dhugaa ta'e filachuun<sup>14</sup> shakkiisaa haa dhabamsiisu. Ergasii odoo salaamata hin baafatin dura sujuuda lama haa bu'u.<sup>15</sup>

Sababaawwan olitti ibsaman akka mul'isanitti haallin sujuuda dagu barbaachisan heddu. Fakkeenyaaf sagadaan odoo salaata hin geessine salaamata baafachuu, raka'aa dabalee sagaduu fi sunnaawwan salaata keessatti hijjatamuu qaban dhiisuu, kkf. dabalata.

## SALAATA JAMA'AA (WALIINII)

Salaata dirqamaa<sup>16</sup> jama'aan sagaduun sunnaa jabaa (sunnatul mu'akkadaa) dha. Mindaa (ajrii) heddus argamsiisa.

Ibni Umar (RA) akka jedhanitti Ergamaan Rabbii (SAW) akkana jedhu. «Salaanni jama'aan sagadamu isa kophaa sagadamurra sadarkaa diigdamii torbaan caala.»

(Bukhaarifi Muslim gabaasan)

«Namni tokko salaanni inni jama'aan sagadu isa kophaasaa manasaafi iddoo daldalasaatti sagadurra sadarkaa diigdamii shaniin caala. (Sadarkaa kana argachuuf) namichi wuduu'asaa sirritti godhatee gara masjiidaa kaayyoma kanaaf yoo deeme argata. Balleessan isaas ni haqamaaf. Erga sagadee booda yoo bakka itti sagade ture-waan wuduu'a hin hiikiniin-du'aa'in malaa'ikotaa isarraa hin fagaatu. "Yaa Rabbi! araaramiif, rahmata godhiif" jechuun isaaf kadhatu. Yoo odoo wuduu'a hin hiikin taa'ee salaata itti aanu eege ammoo akkuma waan salaata keessa jirutti lakka'amaafi.»

(Bukhaarin gabaasan)

---

<sup>14</sup> Fak. namichi raka'aa sadi yookan afur sagaduusaa yoo shakke sadi sagaduusaa waan shakkii hin qabneef kan afraffaa raka'aa tokko haa dabaluu.

<sup>15</sup> Bukhaarifi Muslim sujuuda dagu (salwii) salaamtaa booda nabiyyichi (SAW) akka raawwatan gabaasaniiru.

<sup>16</sup> Salaatota nafliis jama'aan sagaduun ni danda'ama ykn mubaahi (ni ga'a). Salaata naflii Nabiyyii (SAW) wajjiin Ummu Suleeym, Ummu Haaram, Anas ibni Maalik... akka sagadan beekameera.

Ammas akka Abuu Hureeyraa (RA) irraa odeeffametti yeroo tokko namni ijaan hin argine tokko Nabiyyichatti dhufee «Yaa Ergamaa Rabbii! nama gara masjiidaa na geessu hin qabu» jechuun manatti akka sagadu hayyama akka godhaniif gaafate isaanis ni hayyamaniif. Akkuma inni gara galee xinnoo deemen waamanii «azaana dhageetta moo?» jedhaniin. Innis «eeyyen» jedheen. «Eegasuu gara masjiidaa dhufuu qabda» jedhaniin.  
(Muslim gabaasan)

Abuu Hureeyraan (RA) akka dabarsaniiti Nabiyyiin (SAW) akkana jedhaniiru. «Gooftaa nabseen tiyya harkasaa jirtutti kakadhee, qoraan walitti qabsiisee sana booda nama salaata sagachiisu erga bakka buusee booda namoota salaata jama'aa hin dhufnerratti mana gubuuf yaadee ture.»(Bukhaarifi Muslim gabaasan)

Abuu Dardaa'i (RA) akka odeessanitti Nabiyyiin (SAW) akkana yoo jedhan dhagahamaniiru. «Namoonni aanaa yookan ganda tokko keessa jiraatan sadihillee yoo ta'an jama'aan yoo hin sagadin sheeyxaanni isaan booji'a. Waa'ee jama'aa adaraa! yeeyyilleen kan nyaattu re'ee daa'aa (ra'oota heddu) irraa adda baate waan ta'eef.»  
(Abuu Daawud gabaasan)

### **Yaadachiisa**

- 1) Sagadaan tokko imaama boodan yeroo sagadu "raka'aa" sana argate (dhaqqabate) kan jedhamu xinnaatee yoo rukuu'a irratti imaama dhaqqabate qofa ta'a. Ruku'a booda (erga ol jedhamee, sujuudarratti...) yoo dhaqqabe "raka'aa" sana hin arganne. Garuu bakkuma dhaqqabaterraan imaama hordofuu qaba. "Raka'aa" jalaa darbe erga imaamni salaamtaa baafatee booda guuttata.
- 2) Ma'imuumni yookan namni imaama duuban hidhatee sagadu tokko sawaaba (mindaa) salaata jama'aa argachuuf xiqqaatee yeroo "*subhaanallaah*" isa jechisiisu tokko odoo imaamni salaamtaa hin baafatin dura argachuu qaba.



# SALAANNI HALKANII (TAHAJJUDNI YOOKAN QIYAAMUL-LEEYLI) MINDAA ARGAMSIISU

Rabbiin (SW) Nabiiyicha kabajamaa (SAW) akkana jechuun ajajeera:-

«Halkan irrallee akka dabalata siif ta'u, isaan (qur'aanan) salaata tahajjudaa sagadi. Goftaan kee dhugaan iddoo faarfamaa si dhaabufi.» (Al-Israa'i:79)

﴿ومن الليل فتهجد له نافلة لك عسى أن يبعثك ربك مقاما محمودا﴾

Aayanni olitti ibsame kan qajeelan ilaalu nabi Muhammadiin (SAW) ta'ullee muslimni hundi karaa isaanii hordofuu waan qabuuf "salaatul-leeeylin" yoo sagade gaariidha. (Garuu dirqama miti.) Keessattuu obboleewwan dardarraniifi shamarran da'iwaarratti bobba'an barbaachisummaa salaatul-leeeylii hubachuu qabu.

Namoonni "sallatul-leeeylin" sagadan rahmataafi "tawfiqa" (tola) Rabbii argachuu kan qaban namoota filatamoo ta'uusaanii qur'aana keessatti ibsameera.

«Isaan dhugaan Rabbiin sodaatan ashaakiltiifi burqituuwwan keessa ta'aniit waan Rabbi isaanif kenne fudhatu. Kunis waan isaan kana dura (duniyaarratti) toltuu dalagaa turaniifi, halkan irrallee xinnoo qofa rafaawaan turaniifi.» (Az-Zaariyaat" 15-17)

﴿إِنَّ الْمُتَّقِينَ فِي جَنَّاتٍ وَعُيُونٍ آخِذِينَ مَا أَرَاءَهُمْ مِنْ رِبِّهِمْ إِنْهُمْ كَانُوا قَبْلَ ذَلِكَ مُحْسِنِينَ كَانُوا قَلِيلًا مِّنَ اللَّيْلِ مَا يَهْجَعُونَ﴾

«Gabroonni Al-Rahmaan isaan dachii irra suutan (gadi ufqabaa) deeman, (isaan) yoo wallaltonni (kashlabboonni) hamtuu jedhaniin nagaa (dubbii nagaa) jedhaniinifi, akkasumas isaan Gooftaa isaanitiif sujuuda godhaa dhaabbataa bulani.» (Al-Furqaan: 63-64)

﴿وَعِبَادُ الرَّحْمَنِ الَّذِينَ يَمْشُونَ عَلَى الْأَرْضِ هَوْنًا وَإِذَا خَاطَبَهُمُ الْجَاهِلُونَ قَالُوا سَلَامًا، وَالَّذِينَ يَسْتَوُونَ لِرَبِّهِمْ سُجَّدًا وَقِيَامًا﴾

Namoonni halkan Rabbiif dhaabbataa bulan mu'uminoota haqaatifi warra qur'aana qeebalan ta'uun isaanii ragaa bahameefiira.

«Warri aayatoota (qur'aana) keenyatti amanan isaan yoo isaan gorfaman sujuudaf kufan, kan faaruu Gooftaa isaanitiin Isa qulqullees-saniifi isaan hin koorre. (Isaan) Gooftaasaanii sodaachaa, (araarasaa) kajeelaa, Isa kadhataa cinaacha isaanii iddoo hirriba isaanirraa fageessaniifi warra waan isaaniif kennine irraayis sadaqatani. Nafseen tamille mindaa waan hojjataa turtee waan ijji itti gammaddu irraa waan isiif dhoksame hin beektu.» (As-Sajdaa: 15-17)

﴿إِنَّمَا يُؤْمِنُ بِآيَاتِنَا الَّذِينَ إِذَا ذُكِرُوا بِهَا حَمَرُوا سُجَّدًا وَسَبَّحُوا بِحَمْدِ رَبِّهِمْ وَهُمْ لَا يَسْتَكْبِرُونَ، تَجَافَى جُنُوبُهُمْ عَنِ الْمَضَاجِعِ يَدْعُونَ رَبَّهُمْ خَوْفًا وَطَمَعًا وَمِمَّا رَزَقْنَاهُمْ يُنفِقُونَ، فَلَا تَعْلَمُ نَفْسٌ مَّا أُخْفِيَ لَهُم مِّن قُرَّةِ أَعْيُنٍ جَزَاءً بِمَا كَانُوا يَعْمَلُونَ﴾

Namoonni salaata halkanii sagadan warra hin saganne irra sadarkaa caalu kan qaban ta'ulleen ibsameera.

«Sila namichi yeroowwan halkanii Rabbiisaa gabbaruuf sujuda bu'aa dhaabbataa bulu, kan akhiraasodaatufi kan rahmata Gooftaasaa kajeelu (akka namicha Abdii hin qabne kan kafareeti? jedhiin). Sila isaan beekaniifi isaan hin beekne walqixaa? jedhiin, warriin hubachuu danda'an isaan sammuu (yaadu) qaban qofa.»

(Az-Zumar:9)

﴿أَمِنَ هَوَاقِنَاتِ آتَاءِ اللَّيْلِ سَاجِدًا وَقَائِمًا يَحْذَرُ الْآخِرَةَ وَيَرْجُو رَحْمَةً مِنْ رَبِّهِ قُلْ هَلْ يَسْتَوِي الَّذِينَ يَعْلَمُونَ وَالَّذِينَ لَا يَعْلَمُونَ إِنَّمَا يَتَذَكَّرُ أُولُو الْأَلْبَابِ﴾

Hadiisa keessatti ammoo kanneen kanatti aanan arganna. Abdullaah ibni Salaamaa (RA) akka odeessanitti Ergamaan Rabbii (SAW) yeroo Madiinaa seenan Haasa'a godhan keessaa tokko «Yaa ilmaan namaa! salaamata facaasaa (nagaa wal gaafadhaa), (hiyyeeyyii) nyaachisaa, firummaa sufaa, yeroo namni rafetti (halkan) ka'aa sagadaa-akka jannata nagayaan galtaan» kan jedhu keessatti argama.

Salmaan Al-Faaris (RA) akka odeessanitti Nabiiyyiin Rabbii (SAW) akkana jedhaniiru: «Halkan sagaduun isinirra haa jiraatu! Kun muuxannoo `namoota qajeelloo isin duraati, gara Gooftaa keessanii kan isin kaleessu, balleessaa keessan kan haqu, hamtuu hajjachuu irra kan isin dhoorgufi dhukkuba. qaamakeessan keessaa kan dhabamsiisu waan ta'eef.»

«Galgala yeroo raftan halkan kaatanii sagaduuf niyyadhaa rafa. Hirriibni keessanis yoos ibaadaa isiniif ta'a. Yoo odoo hin' kaane subhiin isinitti ga'ellee waan niyyatan hin dhabdani. Halkan yoo kaatan, erga wuduu'a gootanii booda raka'aa lama gaggabaabduu sagaduun salaata halkanii jalqabaa: Salaatul-leeyli galgala sa'aatii afur irraa jalqabee hanga subhitti sagadamuu danda'ullee halkan sa'aatii saddeet booda ka'anii sagaduun garuu

filatamaa dha. Baay'inni raka'aa sagadamuu raka'aa tokko irraa hanga kudha sadihii ta'uu akka danda'u beektonni baay'een ni dubbatu. Kanaaf baay'inni raka'aa akkaataa fedha, dandeettifi muuxannoo namicha sagaduutin murtaa'a. Raka'aa lama lama yookan afur afur sagadaa salaamata baafadhaa, yoo xumuruu feetan raka'aa tokko yookan sadi witrrii sagadaa.»

«Namni halkan dadhabbii hirribaatin sagaduu hin danda'in yeroo gidduu subhiifi zuhrii jiru keessatti qadaa baasuu ni danda'a. Sawaabni (mindaan) isaa kan namoota halkan sagadaniitin baay'ee wal hin dabru» jechuun Bukhaarifi Muslim gabaasaniiru.

## **QIYAAMU RAMADAAN (SALAATA-TARAAWIIHAA)**

Qiyaamu Ramadaan (salaatut-taraawiih) dhiiraaf dubartilleef sunnaa, dha. Yeroon isaas Ramadaana keessa salaata ishaa'ii boodafi odoo witrriin hin sagadamin dura yoo ta'u, raka'aa lama lamaan sagadaa raka'aa saddet, kudha tokkoo yookan hanga diigdamaa dheerachuu ni danda'a. Yeroon isaas hanga dhuma halkaniitti ni tura.

Abuu Hureeyraan (RA) akka odeessanitti Nabiiyyiin (SAW) akkana jedhaniiru:- «Namni amantii guutun (Rabbirraa) mindaa argadha jedhee Ramadaana dhaabbate (taraawiiha sagade), Rabbi balleessaa inni sana dura hojjate isaaf dhiisa.»

(Bukhaariin, Muslimiifi kan biraas gabaasan)

Aa'ishaan (RA) akka odeessanitti Nabiiyyiin (SAW) yeroo tokko (salaata taraawiihaa) masjiida keessatti sagadanii turan. Namoonni hedduu isaan hordafaniiru. Guyyaa lamuus ni sagadan. Namoonni baay'inaan kan gaafa duraa caalanis ni argaman. Guyyaa sadaffaa namoonni heddu walitti qabaman. Nabiiyyichi

(SAW) garuu manasaanitti hafan. Borumtaa sahaabota isaanitiin akkana jedhan:- «Waan isin (halkan kalleessaa) hojjattan argeera. Ani garuu kan hin dhufin waaan (salaanni taraawiihaa) tun akka isinirratti dirqama hin godhamne sodaadhef ture» jedhaniin.

(Tirmiizii malee gabaastonni hadiisaa kan biroo gabaasaniiru)

Aa'ishaan (RA) akka beeksisanitti Nabiyyiin (SAW) Ramadaana keessas ta'ee yeroo biraa raka'aa kudha tokkoo ol (salaata halkanii) sagdaniin hin beekan.

(Gabaastonni hadiisaa hundi irratti waliigalaniiru)

Jaabir ammoo (RA) Nabbiyyii (SAW) wajjiin raka'aa saddeet taraawiihafi raka'aa tokko witrrii akka sagadan ibsaniiru.

(Ibni Khuzeeymafi ibni Hibbaan gabaasaniiru)

Waggoota Umar Ibnul-Khaxxaab, Usmaanifi Aliin (RA) hayyuduroota islaamaa turan namoonni taraawiiha raka'aa diigdama sagaduunsanii mirkanaa'eera.

### **Yaadachiisa**

Zabana kana baay'inaan salaanni taraawiihaa kan sagadamu raka'aa diigdama ta'ullee namoonni raka'aa saddeet yookan kudha tokko sagadanis hadiisan ala akka hin ta'iniifi inumaa warra sunnaa nabiiyyii eegan ta'uun beekamuu qaba. Gara biraatin namoonni raka'aa diigdama sagaduun sunnaa miti jedhan dogoggoraniiru. Waan khaliifawwan hojjatan dalaguunis qaama sunnaa ta'uun dagatamuu hin qabu.

## **SALAATA DUHAA**

Salaanni duhaa kan sagadamu aduun baatee yoo sirritti mul'atterraa jalqabee hanga walakkaa guyyaatti yoo ta'u jaalatamaa (mustahabbii) waan ta'eef namni Rabbirraa mindaa (ajrii) kajele yoo sagade gaariidha. Namoota salaata kana dhiisan irratti garuu mormiin homaatu hin jiru.

Abuu Sa'iid (RA) akka odeessanitti:- «Nabiyyun Rabbii (SAW) "Adduhaa sagadaa turan, homaa dhiisanii hin beekan yaada jedhu irra hanga geennutti", "ni dhiisus turan hanga kana booda hin sagadan yaada jedhu irra geennutti"» jedhaniiru.

(Tirmiiziin gabaasan)

Adduhaan raka'aa lamaa hanga saddeetii kan sagadamu yoo ta'u mindaan isaas hadiisa kanatti aanun ibsameera.

Bureeydaan (RA) akka odeesanitti Ergamaan Rabbii (SAW). «Ilmi namaa iddoo qaamni isaa waalitti sufamuun dhibba sadihiifi jahatama qaba. Tokko tokkoosaaf 'sadaqaa' barbaachisa» jedhan. «Yaa Ergamaa Rabbii (SAW)! kana maaltu danda'a» jedhamnaan «masjiida keessatti waan tufame yoo arge awaalun (haxaayun) yookan karaa irraa waan nama gufachiisu kaasun fixachuu danda'a. Yoo kanas dadhabe salaata adduhaa raka'aa lama sagaduun isaaf gaha.» jechuun deebisaniiru.

(Ahmadiifi Abuu Daawud gabaasan)

## SALAATA KUSUUFAA

"*Salaatul-Kusuuf*" kan jedhamu aduufi jiini (baatin) yoo tokko kan biraa haguugu salaata sagadamu yoo ta'u, beektonni sunnaa jabaa (sunnatul-mu'akkadaa) ta'uusaa dubbatu. Jama'aan yoo sagadame kan filatamu ta'ullee kophaa sagadulleen ni danda'ama. Wayta aduufi baatin wal dhoksan qajeellomaan "assalaatu jaami'aa" (salaataf walitti qabamaa) jechuun waamichi ni godhama.

Baay'inni raka'aa lama yoo ta'u, tokko tokkoo raka'aa keessatti rukuu'a (gadi jecha) lama qabaata. Aa'ishaan (RA) akka odeessanitti:- «Zabana Nabiyyii aduun haguugamtree turte, Ergamaan Rabbiis (SAW) gara masjiidaa deemanii salaaticha "*Allaahu Akbar*" jechuun jalqaban. Namoonnis isaan duuban tarree galan. Isaanis qur'aana dheeressanii erga qara'anii booda

*"Allaahu Akbar"* jechuun gadi jedhan. Rukuunis dhaabbatarra xinnoo gabaabaa haa ta'u malee yeroo dheeraa tursiise. Ergasii *"Sami'allaahu liman hamidahu Rabbanaa lakal-hamdu"*<sup>17</sup> jechaa ol jedhanii dhaabbatanii qur'aana xinnoo raka'aa duraa irra gabaabsanii qara'an. Ergasii rukuu'a isa duraa irra xinnoo gabaabaa ta'e godhan. Ergasii *"Sami'allaahu liman hamidahu Rabbanaa lakal-hamdu"* jechaa ol jedhan. Sana booda sujuuda godhan (al-lama). Raka'aa lammaffaas akkuma isa duraatin raawwatan. Kunis raka'aa afuriifi sujuuda afur sagadan jechuudha. Odoo isaan bakkee itti sagadanii hin socho'in aduun baate. Erga sirritti Rabbiin galateeffatanii booda akkana jedhan:- «Aduufi baatin aayatoota Rabbii keessaa isaan tokko. Namni kamillee waan du'eef yookan waan dhalateef hin haguugaman. Haguugamanii yoo argitan garuu dafaa gara salaataa deema<sup>18</sup>.»

(Bukhaarifi Muslim gabaasan)

### SALAATA ISTIKHAARAA

Waan halaala (hayyamamaa) ta'e tokko hojjachuuf barbaadanii yoo filannoowwan lama isin dhaqqabanii murteessuf rakkattan *"salaatul-istikhaaraa"* (salaata filannoo) sagaduun sunnaa dha. Dhimmichi ulfaataa yookan salphaa ta'uu danda'a.

*"Salaatul-istikhaaraan"* yeroo kamillee sagadamuu ni danda'a. Akkaatan itti sagadamus akkuma salaata kaawwaniiti. Baayinni raka'aasaas lama qofaadha. Sagadni akkuma xumurameen du'aa'ii kanatti aanu gochuun sunnaadha.

---

<sup>17</sup> Rabbiin faaruu nama Isa faarsee dhagaye, Gooftaa keenya faarun keetuma.

<sup>18</sup> Yerootti waan ilmi nabiyyii (SAW) -Ibraahim- du'eef aduun gaddaaf jecha haguugamte ilaalcha jedhutu ture. Nabbiyyiin garuu ilaalchi kun sirrii akka hin ta'in ibsaniiru.

Jaabir (RA):- «Nabiyyiin (SAW) "istikhaaraa" (salaata filannoo) dhimma kamirrattillee (akka sagadnu) nubarsiisaa turaniiru. Tokkoon keessan dhimmi ta'e yoo isa yaachise raka'aa lama sagadee (du'aa'ii kanatti aanu) haa qara'u nuun jedhaniiru.» jedhu.

((اللهم إني أستخرك بعلمك وأستقدرك بقدرتك وأسألك من فضلك العظيم، فإنك تقدر ولا أقدر، وتعلم ولا أعلم وأنت علام الغيوب. اللهم إن كنت تعلم أن هذا الأمر.... خير لي في ديني ومعاشي وعاقبة أمري أو عاجله وآجله فاقدره لي ويسره لي ثم بارك لي فيه، وإن كنت تعلم أن هذا الأمر شر لي في ديني ومعاشي وعاقبة أمري أو عاجله وآجله فاصرفه عني إصرفني عنه واقدر لي الخير حيث كان ثم ارضني به)) رواه مسلم

### Hiikkaa

"Yaa Rabbi! beekumsa keetin (gaarii) naaf filadhu, dandeettii keetin akka na dandeessiftu si kadha, badhaasa kee guddaa irraa si kadha. Ati danda'aadha - ani garuu hin danda'u. Ati bekadha ani garuu hin beeku. Ati beekaa waan fagoo jiru hundaati. Yaa Rabbi! dhimmi kun<sup>19</sup> amantii kiyyaaf, jiruu kiyyafi booddee kiyya kan duniyaafi aakhiraatif kan nafayyadu yoo ta'e naaf murteessi, naaf laaffisi, ergasii isa keessatti barakaa naaf godhi. Yoo dhimmi kun amantii kiyyaaf, jiruu kiyyaafi booddee kiyya kan duniyaafi aakhiraatif sharrii ta'e isa narraa deebisi, anas isarraa fageessi. Eessas ta'u kan isa caalu naaf murteessi, ergasii (jijjiirraa kanaa) na jaalachiisi." (Muslim gabaasan)

## SALAATA HAAJAA

"Salaatul-haajaan" namni tokko wayta dhimma tokko yaadee, dhimmi yaade akka guutamuuf rahmata Rabbii kajeelun salaata sagadamu.

---

<sup>19</sup> Bakka "dhimmi kun" jedhu abbaan dhimmaa hajaasaa ibsuu qaba.



Akka Ahmad gabaasanitti Abuu Dardaa'i (RA) Nabiiyyiin (SAW) akkana jechuusaanii ibsaniiru: «nama wuduu'a sirritti godhatee, ergasii raka'aa lama guutuu sagade Rabbiin waan kadhate isaaf kenna-hardha (adunyaa irratti) yookan boru (aakhiratti).»

## SALAATA ISTISQAA

Roobni yoo dhabamuufi gogiinsi yoo mul'atu akka Rabbiin (SW) rooba roobsu kadhachuuf salaata sagadamu.

Waytiiwwan salaata sagaduun "*karahaa*" (jibbamaa) ta'u malee yeroo kamillee kan sagadamuu danda'u yoo ta'u baay'inni raka'aasaa lama. Raka'aa jalqabaatti imaamtichi "*faatihaa*" fi "*sabbihisma rabbikal A'ilaa*" sagalee ol fuudhee qara'a. Raka'aa lammaffatti ammoo "*faatihaa*" booda "*suuratul-Ghaashiyaa*" qara'uutu irraa eegamma.

Erga salaanni xumuramee booda imaamni "*khuxbaa*" gochuu qaba. Ergasii gara qiblaa gara galuuni fi uffata isaanii (kan mirgaa bitaatti, kan bitaa mirgatti) garagaggalchanii uuffachuun du'aa'ii godhuu qabu (imaamafi hordoftoonnis). Du'aa'iwwan yeroo kana godhaman keessaa tokko qofa ibsina.

Amri ibni Shu'eeybi sahaaban jedhaman (RA) akka odeessanitti: Nabiiyyiin (SAW) yeroo roobaf du'aa'ii godhan akkana jedhanii turan.

((اللهم استق عبادك وبمائتك، وانشر رحمتك، واحى بلدك الميت)) رواه أبو داود.

### Hiikkaa

"Yaa Rabbi! gabroota keetifi horii (nabse-qabeeyyii) kee obaasi (roobsisiif). Rahmata kee facaasi, dachii kee du'aa kanas jiraachisi."  
(Abuu Daawud gabaasan)

Salaanni sagadamee du'aa'in erga godhamee booda yoo namoonni sagadan iimaana sirrii ta'e qabaatan Rabbiin (SW) kadhaasaanii ni dhagahaaf (ni qeebala). Yeroo roobni dhufes «Yaa Rabbi! rooba faayida-qabeessa godhi» jedhanii du'aa'ii gochuu qabu. Karaa birootin yoo roobni cimaan dhufee rakkina geesse du'aa'ii kanatti aanu qara'uu qabu.

<p>Allaahumaa ij'alhaa suqyaa rahmatin, walaa taj'alhaa suqya azaabin, walaa mahqin walaa balaa'in, walaa hadamin walaa gharaqin. Allahumma alaz-ziraabi wal akaami wamanaatish-shajari, wabuxuunil awdiyati. Allaahumma hawaaleeynaa, walaa aleeyna.</p>	<p>اللَّهُمَّ اجْعَلْهَا سُقْيَا رَحْمَةٍ وَلَا تَجْعَلْهَا سُقْيَا عَذَابٍ وَلَا مَحْقٍ وَلَا بَلَاءٍ وَلَا هَدْمٍ وَلَا غَرَقٍ، اللَّهُمَّ عَلَى الظَّرَابِ وَالْأَكَامِ وَمَنَاتِ الشَّجَرِ وَبَطُونِ الْأَوْدِيَةِ، اللَّهُمَّ حَوَّالَتِنَا وَلَا عَلَيْنَا.</p>
---	---

### Hiikkaa

"Yaa Rabbi! rooba raahmataa taasisi, rooba balaa (azaabaa) hin-taasisin. Yaa Rabbi! gaarrinirratti, hidda mukaa jalatti, lolaawwan keessatti taasisi. Yaa Rabbi! daagawwan keenyatti roobsisi, garuu nurratti hin roobsisin."

## SUJUUDA TILAAWAA (SUJUUDA QIRAATII)

Qur'aana keessa aayatoota sujuuda nama buusan namni qara'e yookan yoo kan qara'amu dhagaye (altokko qofa) sujuuda gochuun jaalatamaa (mustahabbi) dha. Yoo bu'an "*Allaahu Akbar*" jechuu malee "*Attaahiyyaatnis*" ta'ee salaama baafachuun hinjiru. Kun "*Sajdatut-tilaawaa*" (sujuuda qiraatii) jedhamti.

Raafi'i waan Ibn Umar (RA) irra dhagayan akka odeessanitti:- «Nabiyyiin (SAW) qur'qaana nuuf qara'aa turaniiru. Yoo aayata sujuuda buusisu qara'an "*Allaahu Akbar*" jechuun sujuuda godhu. Nutis isaan wajjiin sujuuda goona.»

(Abuu Daawud, Beeyhaaqifi Haakim gabaasan)

Fayidaa "*sajdatat-tilaawaa*" ilaalchisanii Abuu Hureeyran (RA) waan Nabiyyirraa dhagahan odeessaniiru. «Ilmi namaa aayaa sujuuda nama buufu qara'ee (dhagayee) yoo sujuuda godhu sheeyxanni booyaa namicharraa fagaata. 'Badii tiyya (namichi) sujuudatti ajajmee, sujuuda godhe, jannanni isaaf mirkanoofta, ani akka sujuuda godhu ajajamee, didee, ibiddi naaf mirkanoofta' jedha.» (Ahmadiifi Muslim gabaasan)

Daaral Quxniyyiifi Munzariin hadiisa gabaasan keessatti akka ibsanitti, aayatoonni qur'aanaa kan kanatti aanan sujuuda nama buusisu<sup>20</sup>.

-Al-A'iraaf: 206  
-Ar-Ra'id: 15  
-An-Nahli: 49  
-Al-Israa'i: 107  
-Maryam: 58  
-Al-Hajj: 18  
-Al-Hajj: 77  
-Al-Furqaan: 60

-An-Namli: 25  
-Sajdaa: 15  
-Suwaad: 24  
-Fussilat: 37  
-An-Najmi: 62  
-Al-Inshiqaaq: 21  
-Al-Alaq: 19



---

<sup>20</sup> Eennullee salaata keessas ta'ee salaatan ala aayatoota kanneen keessaa tooko yoo qara'e sujuuda gochuu qaba.

## KITAABOLEE MADDAA (WABII)

- Fiqhus-Sunnaa.....فقہ السنۃ
- Sifaatu Salaatun-Nabiyyi .....صفة الصلاة النبوی
- Riyaadus-Saalihiin.....ریاض الصالحین
- Attarghibu Wattarhiib.....الترغیب والترہیب
- Al-Muqaddimatul-Hadramiiaa.....المقدمة الحضرمیة
- Kitaabul-Fiqhi Alaa .....کتاب الفقہ علی  
Mazaahibil-Arba'aa.....مذہب الأربعة
- Binyatal Mujtahid.....بنیة المجتہد